


CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
DEC 17 1940

20

T-3222/0.83.2







福建續志卷四十五

哈佛大學漢和  
圖書館珍藏印

人物五

泉州府

明

陳用賓字道亨晉江人隆慶進士授長洲令平賊清  
獄抑奢崇儉召人為御史巡鹽河東鹽地苦久雨  
積課虧盡用賓竭誠禱於中條山雨立霽池鹽遂  
生既生苦無南風用賓禱輒應鹽積如山改按淮  
揚考較薦劾一出至公以忤張居正出為四川叅  
議累陞湖廣布政使以都御史巡撫雲南緬猛為



患用賓招木邦以夷攻夷殺及俺及其子多亨多  
洪三宣以寧事聞賜勅賚金永昌金騰屢被緬思  
於銅壁諸處設關堡開屯田收米養兵省轉運費  
緬賊復糾衆欲吞蠻莫窺思化擇將發兵追敗之  
斬丙測擒賊十六人晉秩賞銀幣順寧府土舍猛  
廷瑞者孟獲後也土官奉赦世守大侯州其族奉  
學分管雲夢十三寨謀奪州印通於廷瑞與興兵  
攻奉赦焚州治用賓上疏欲令廷瑞執奉學贖罪  
不從則以兵臨之先遣人諭廷瑞不聽決策用兵  
廷瑞計窮斬奉學首以獻遂奔據觀音山有旨撫

鎮官協力共勦於是分遣四路兵攻之廷瑞走洛  
黨獲之順寧平改土爲流設知府改大侯爲雲州  
仍以奉赦爲之無何十三寨復叛又討平之晉右  
都御史兼兵部右侍郎廕一子稅璫楊榮欲通蠻  
莫道開寶并致緬賊阿瓦興兵犯蠻莫用賓疏謂  
蠻莫三宣之藩籬欲保藩籬當罷採買帝不能用  
而楊榮羅織立感誣執把總尹希舜首截買寶石  
富民郭之翰等買地獲金刑索黃金至千兩激變  
數州縣用賓疏陳榮罪請置之法速罷礦稅疏皆  
留中榮復不悛拷死指揮梁棟刑責樊高明荷校



時衛官賀世勳韓光大等乘小民激變執刀劍排  
牆而入殺榮付烈燄中用賓疏言激變之由分別  
情罪請旨帝誅世勳及亂民張守志等四人滇以  
復安而帝以用賓不能保全權使眷亦稍衰時用  
賓撫滇已十餘年念母老屢疏乞歸不允而阿克  
之難作阿克者武定土官鳳朝文孫也嘉隆間屢  
叛討平改武定府流官其屬州人鄭舉恨知州黃  
榜欲死之謀阿克起兵復故地知府陳典知其謀  
攜印避入省城武定遂陷克長驅至省城大焚掠  
索武定印甚急用賓倉卒徵調未至士民環跪泣

請權宜出印與之給賊去徵兵進攻擒其渠魁十  
二人克舉遁入東川大兵從後躡之士酋祿壽祿  
哲等執克舉以獻朝議不論其勦賊功而科棄印  
之罪論逮下獄帝知其冤以稅使故緩其恩貸用  
賓在獄九年日取叅同契金丹正理諸書玩味紬  
繹若有所悟一日謂其子曰吾今年必出但未必  
何如出耳亡何疾作司寇許移外治疾遂卒  
閩書叅  
史朝鉉字貫之晉江人隆慶進士授嘉善令邑賦不  
均强者規免而以窶應役值編審按戶高下輕重



布之無所假貸上計無資自彭城策蹇入都擢南京吏科給事中頒歷例有侑金盡却之居三載侃侃多指陳大瑞中信守備留都勢凌大司馬而踞其上騷擾及民疏劾其違制十罪諸闈求解於張君正乃免逮乙亥復筦大計會同年戶科余懋學疏時政居正憾其刺已削懋學籍而移忤朝竒與書曰主上冲聖居垣首以安靜爲福旋出知湖州府履任值溽暑躬閱繫囚不待訊爰書而瀚雪冤濫者十餘輩未幾瘧發力疾主丁祭在任五月卒

雲臺  
藏稿

楊佩訓字維式晉江人隆慶進士授戶部主事權濬墅關稅搜蠹剔蠹無使胥吏漁穴酌歲課若干大率徵商若干定爲額稅半額蠲其伍稍及額蠲其八及盈額卽弛不征鑽橋例可數百金他無名征倍是一切罷之移監徐洪兼董水部分司始治吳關狀商船民艇稅抽如法足額而止官軍給餉例有抽耗金却不受例由是除遷四川叅議駐劄涪州會有大水至郝直指欲論州縣科派者七人合州劉牧與焉劉居官廉佩訓爲白其冤郝怒郝與佩訓濬墅周旋不快意至是修前郟又是時父老



百姓伏關訟劉寃劉得不去官郝疑佩訓所使因  
疏論佩訓調廣西叅議猺獞爲亂爲總督畫策討  
之猺卒平擢桂林副使調四川備兵敘馬瀘釐軍  
實慎封守飭行吏無生事戒上酋無侵掠按行屬  
郡偵其貪廉勤惰以聞人人惴懼三郡久無甲第  
召士爲文馳其駟上下之自是魏科累掇馬湖遭  
火延燒千餘家發粟出賑全活萬計烏撒酋長故  
子阿六爭立臺檄二藩司議不決佩訓一言而定  
播會楊應龍習亂有議撫者亟上三策請征當事  
委佩訓西路監軍會北路兵失利軍中傳檄退兵

佩訓沮之令堅壁如故獨與叅軍曹希彬殿後以

歸五年轉叅政歸數月卒

景壁集叅

張會宗字于震晉江人隆慶進士授太常博士帝躬

親祀典會宗贊裸趨蹌每見屬日以不附柄臣遷

兵部主事出守台州調岳州爲守廉平簡易好與

民興利其在台時出寃滯數十獄開支河歸廣東

湖築興福塘鑿嵩山港引水溉田水患遂熄會調

岳州救災賑饑與民興草量田定稅築堤繕城荆

藩構獄久不決反覆停讞備得其情諭以東平河

間之誼諸王感悟巴陵俗悍好爭罪其峻訟者曲



諭之俗以頓化政先撫字而後催科賦稍不前停其俸夷然也屬邑至爲民語郡伯勞狀民感激爭

輸課立稱最遷雲南副使卽歸

舊志參景璧集

蔡國炳字誠中晉江人萬歷進士授永豐令邑因賦役繁重民多流徙陳救豐七議以甦民困逃亡復歸旋擢都水值修陵祀舟行河膠先募能水者度淺深作木龍築堤瀦水順流而下鷁行如飛帝廉其能出督清江漕艘先是稍船敝盡更新之一船費數千緡仰給歲商不可稽覈乃度稅入與船費酌爲定式敝則更新大敝乃改造凡可留者因之

每艦省將作之半計三年省費千餘萬貯郡帑以備緩急漕無滯而稅不加工商稱便永以爲法歷稽勳郎中拔孤振滯不受私託銓法一清顧爲同事所忌出爲廣東參政治尚簡易蠲魚稅均胥差清歲輸恤疑獄時中嚴閩船下廣之禁漳人陳子實犯當辟議生之不得乃分首從以監斃者抵罪餘皆論配全活甚衆有將會領餉金千餘未散被竊匿贓世胄家廉得其狀治之調四川副使駐臨邛卽有瀕江水行四十里至秦梁二灣地益滂汛急如飛夏秋漲決田爲魚梁國炳嘆曰險絕如呂



梁尚策而障之障此易矣捐金伐竹令營卒磊石  
爲坎壘土爲堙成功而益州始多沃野土官馬應  
麟歿無嗣其弟應龍欲襲兄職妻翟氏繼良據印  
收稅糾部落與應龍爲難國炳遣諭利害繼良懼  
印遂歸官國炳曰應龍桀驁准其子代襲繼良旣  
納印歸順當多給銀穀以贍餘生詔從之是時新  
建兩官下令採木以川木多出建昌而建昌半屬  
滇境渡瀘峻險採運甚難國炳曰部檄只辦川木  
何必建昌會入賀力陳其狀乃悉如議歸途聞父  
訃服闋以母年屆九旬遂不出

通志參  
景璧集

莊履豐字中熙晉江人祖一俊仕浙江叅政有詩才

履豐萬歷進士選庶吉士授編修冊封韓慶二藩  
却金帛諸餽惟收墨刻數幅甘杞數封朱相國國  
楨尚爲諸生邸舍相隣見其文竒之曰瑩如秋水  
清如寒潭館閣中人也遂與定交及癸未朱果殿  
試第一時服其藻鑑丙戌分校禮闈所取皆名士  
同郡何喬遠黃汝良與焉重修會典成轉修撰賜  
賚有差尋加起居注充經筵官丁外艱卒履豐天  
性至孝事父先意色養弟履朋舉進士爲郎有雋  
聲早夭無嗣當其病時中夜籲天願以身代見人



所長汲引推薦不遺餘力或聞有過掩覆周旋惟恐其失名喪位至其邁往之氣有時勃發必奮爲義常熟趙檢討用賢拒疏迂張居正杖闕下人多避之履豐獨左右焉同郡洪司寇朝選爲虎冠吏所阱斃獄中瘞屍三日履豐方北上適與會訟言出之爲經紀祿賄乃去才具敏贍雋氣颯舉復能斂才以就格著有梅谷集

舊志參霞樓藏稿

許國瓚字鼎卿晉江人與兄鎮江守國誠後先登第國瓚萬歷丁丑進士授南京禮部主事改戶部出監兌蘇松催督有法官民稱便出爲廣東僉事處

置誅賊得宜全活甚衆殄除李茂等叛黨兵不血刃有被脇從者已臨刑察寃狀立出之晉貴州參議以內艱歸會徐聞令被糾科臣謂司憲曲庇當左謫服除得郴州約已裕民聽斷平恕尋遷南京戶部員外郎擢守桂林歷參政皆在西粵粵苦徭獐劫掠官其地者動以勦殺徼功國瓚分巡右江賓州八寨徭常出沒第以恩威戢之羣徭帖服民得寧居旣去人思而祀之晉山東按察使卒於官時已遷江西右布政因祀鄉賢

舊志參閩書

張治樞字明勵晉江人萬歷進士授戶部主事尚書



王繼津出各省糧冊令剋期稽算如期應之自此益加推重有疑事及他司事必諮焉會有旨借支邊銀十萬實內庫治樞擬本云糧屬邊儲係國家安危何可動支且邊事不測卒然有急胡以應之疏入事遂寢邊事告匱司帑訕策治樞曰本色支給有餘但陳陳相因腐敗不可食耳部邑不便水運者宜暫改折以濟時急異日太倉之儲或有不支則成憲具在上官然其議請而行之出為越監允正量斛驗燥濕搜剔蠹蟲運官豪右無從侵沒時改折之議方行或稱不便巡撫以問答云法貴

趨時事在變通云不便者徵本色可也云便者全議折徵可也如杭之新城於潛昌化距水甚遠則全折為便富陽一邑在東南西北躬近山才後為便在西北東北鄰近大運本色為便諸如此類度地行之不格成憲國無滯兌民不苦漕矣巡撫深然之旋卒於官

景壁集

林寅賓字爾亮晉江人萬歷進士授行人三奉使問遺盡却擢御史巡按宣大兼督學政閱視邊防舉劾不爽賞罰有章出納維詳三載邊關晏如陳邊陲要務建常平倉定軍馬錢糧經制又奏墾荒田



千八百餘畝免額外新糧請蠲賑以恤災復赦宥  
 諸疑獄重辟及貧民賦贖之不能具者上嘉納焉  
 有以常例三千金進者封還府庫不入私橐還朝  
 勤帝勤視朝親宰輔召還斥逐諸臣時論躋之出  
 為右江叅議會有岑溪之役籌策安撫中外帖定  
 卒於官

採何鏡山集

吳龍徵字堅孺晉江人萬歷進士選翰林院庶吉士  
 授監察御史出督漕運舊官旗運艘率附裝杉木  
 雜物艘重往往敗事龍徵論指揮二十五人於法  
 適颶發艘以輕得濟巡按山東黃縣民訟其令劾

得諸墨狀疏褫其職有豪紳子為暴於里訟者十  
 五家方飭訊而都御史書至龍徵卒置於法東省  
 饑龍徵往視賑有雞飛觸其冠吏屬懼龍徵神色  
 自若且曰無驚百姓還朝疏乞寬宥言官後陞河  
 南叅議以內察謫歸蓋為前書囑宥豪紳子者所  
 陰中尋起判南通擢南京戶部主事歸卒

府志

傅慶貽字有積南安人萬歷進士授番禺令盡革羨  
 餘贖緩毫不入私丁毋憂歸百姓攀號行越日忽  
 有伏謝舟次以織縞十餘束為從者資叱之去其  
 人叩頭哭不起為受其一以當劉寵錢嗣補宜興



張弛得宜民歌豈第累擢南京戶曹出權北新關  
嘗語人曰凡官當以精辨為職獨權關者須存得  
寬一分意思乃可咸頌為仁人之言府志

洪澄源字子定晉江人萬歷進士授戶部主事出為  
桂林知府却鹺商關引例金革府吏加掾入貲者  
又革屠牛肆之納鍰者歲不下千餘金覲行三老  
為哀千金佐費笑而麾之擢貴州副使備兵畢節  
畢節為宣慰安疆臣所轄部地廣兵強冠帶而羈  
縻之爾澄源外制以法內推心置之疆臣畏服播  
會楊應龍為變朝廷命疆臣出兵助戰澄源監疆

臣軍疆臣內懷觀望數張皇城澄源不動疆臣知  
不可恐喝遂進兵戰屢捷應龍授首賜金帛先是  
征應龍時懸賞格許平賊即以地償安既平賊爭  
地未決澄源卑騎往諭令其地屬黔者歸安屬播  
者歸蜀其屬播地而為安近地要害者輸糧安遂  
奉命夷酋奢世續世統爭襲構兵疆臣陰助世續  
時澄源已遷思南制府復令馳諭安隴無助亂兵  
立解思南硯水苗歲為梗所在焚掠帥兵圍冉坡  
石豹遂降擢貴州按察使轉雲南右布政時值阿  
克之變兵匝會城澄源佐守禦以勞卒當遷思南



時疆臣餽二千金不受已潛以二篋雜置裝間行  
數舍乃覺仍叱之去喪還過貴州所至數百人爭  
昇之後兵部李化龍叙川貴功晉秩京卿

聞書叅  
雲臺藏

稿景  
壁集

李仁字靜甫晉江人少從易時中學萬歷中舉於鄉  
授惠州推官繩奸吏以法民有非辜者悉平反之  
勾稽潮州主藏吏多侵牟邑尉恐陰以賄求脫立  
却之按如法直指至惠其所親爲奸利直指陰爲  
地仁持之恁直指不憚私語郡大吏以下爭賈酒  
幣相問絡繹仁不少動曰吾愛此三尺遑恤其他

直指委仁督運欲藉此罷之已知仁却舟車費乃  
嘆服推重署郡篆盡罷諸不便者脫博羅良民數  
十於死興寧饑發倉捐貲以賑擢戶部主事值邊  
警芻粟立辦孫總督欲私其里人委監收仁白與  
例相左孫曰何例也吾所可後卽爲例耳仁持益  
力卒如例一運官上歲餉不如格出孫書爲解仁  
弗啓曰總督安得有書僞也三尺法吾與總督共  
之誰敢私者孫益怒遂以蜚語聞部堂官素知仁  
委令散鹽南圻命下而卒囊中僅書數十卷而已

聞書叅蘇  
紫溪撰志



下日近字光元晉江人萬歷進士授鄆城令邑旱澇頻仍輪蹄旁午民不堪命下車詢疾苦亟白監司通融協濟而中貴橫捶郵吏尼其八騶不得發窘甚乃更爲好語相謝僅得出境過客聞之曰是嘗挫橫璫者亟約車徒去之郵傳始甦舊時門攤權稅卽米蔬負販不免橫索爲酌惟正緩急以時受徵諸瑣細皆條罷士稚魯少文購書分授之而課第其甲乙文風漸振改高淳再試爲吏事益習而意在利民邑有腴田八千餘畝淪於湖歲苦賠輸爲詳豁之諸生貸官廩四百餘石貧不能償盡蠲

除焉臙脂河承宛歛上游諸水而天生橋縮其漑洩歲久石圯噎諸下邑滙爲巨浸高淳尤甚前令議疏鑿皆以費鉅莫敢任日近躬履荒度條上便宜且曰有如有不效請以一官謝百姓士民畚鍤雲興且濬且堰逾五旬而竣遷南京戶部主事以病歸爲仲兄贖故業新祠宇恤宗族歸六年卒

採河

干集

蘇茂相字宏家晉江人萬歷進士授戶部主事遷河南副使政聲懋著督學江西首嚴請託有故輔以三牘進不發函而榜其人輔怒遂掛冠歸陞太僕



寺卿核俵解清牧場蠲落地稅馬政一新擢僉都御史巡撫浙江疏請減免織造停差織監杭城火災浙東西水旱頻仍請免加派並發倉穀賑濟新派袍緞五萬七千五百餘疋需銀一百一萬六千九百餘並歲改造着歸司禮監李實疏請分爲二十運每年春秋二運並酌留米折草折弓箭弦條等銀以紓民力歲改造仍遵舊制歸有司織解並劾李實不得以屬禮凌有司遼東撫臣王化貞以邊事急奏調浙陸兵一萬又請調水兵八千疏請練陸兵免調水兵皆激切敷陳時官軍驟聞調發

悍弁驚卒鼓噪倡亂有哨官糾兵於寧波餘姚間大肆搶掠執械踰城逼挾縣官鄉宦索賞茂相次第擒拿梟示人心以定有昌國哨官蔣良忠逐哨總王翼覬代其任喉兵樹幟以保賢能爲名而拒代者茂相檄副帥張可大之昌國觀變而令團練把總楊懋忠出不意縛良忠杖殺之並擒亂兵洪辰等正法海寇王鐘王錦等嘯聚剽劫給印票質人取贖官兵追勦則遁入深洋收回復肆出行劫出沒閩浙之交往來日本諸島茂相與巡道賈充元督勦一戰用彈打死香公老等九賊再戰斬渠



魁三大王首級被傷溺死五老等十餘賊三戰殫死榮我老等餘船遁散復檄各鎮協官軍協勦嚴禁奸人接濟使寇糧匱乏王鐘等窘而乞降計四百餘人分發效用及解回原籍海氛以寧擢兩淮漕撫將移鎮而妖賊葉朗生之變起朗生湖州人妖醫馬文元弟子聞山東白蓮賊反其黨邱大虛等舉事以攻白蓮爲名茂相檄水兵乘夜鼓行復發一虛檄營兵三千繼之詰旦兵至茗衆訝神速人心稍定因以次捕誅吳越底定奸弁劉魁乘寧遠急持經撫咨取淮餉六千緡茂相曰遼中丞暮

春四日受事望日始加巡撫而咨署朔日僞也且篆文不類條十疑鞫之立伏並得其戶部應天二僞檄人稱神明焉河水壅閼舟楫不通躬禱河神一夜水滿糧艘畢達因條上五議晉總督倉場戶部尚書倉場與漕政相表裏茂相入督倉益明諸利弊而添設督餉部臣於天津其人墨而狡輒以截漕爲辭茂相連疏爭之懷宗允行旣改刑部鞫魏瑞逆案手定爰書天下傳焉復清廠衛羅織之獄寧安公主子李承恩擅用龍袍龍盒問斬改徙方震孺以御史監遼軍不宜比守邊將帥例惠世



揚不宜引交結近侍律皆得免加太傅旋以老病乞歸准馳驛還鄉著有皇明寶善類編讀史韻言先覺要言正氣編教家三書戶部疏草刑部題稿奏除妖公案定亂紀畧東征行稿保約全書詩集五卷浙草淮草葵雲草

採蘇氏家傳  
參敬口草石

水集李鹿  
巢文集

林應翔字源澗萬歷進士知永嘉縣歲苦疫春夏尤甚骨肉相棄應翔為申收恤之誼又立五靈廟祀厲鬼疫遂絕後補京山巡歷勸課停車決訟不使至庭楚藩構逆郢中騷動練兵葺城天塹井然遷

南京戶部郎出守汝寧汝黃之交有逋逃主號自

在王應翔殲其魁而瀦其宮調廣州決積贖千六百卷平反死獄八十餘一日棄官歸再起衢州開化有程五龍等盜戕殺官兵使者發兵捕治近村民惶惑鼓譟逐之兵歸告使者村之千餘家盡勝廣也應翔曰無恐獨入巢繫其戎首烏合悉散良民得全肖像祀之遷湖廣副使未之官卒其文奇矯變化不可方物鏡山集詳載之

閩書參何  
鏡山集

徐縉芳晉江人萬歷進士為御史首為顧憲成請諡劾天津稅監馬堂九大罪有敢言名後以巡兩淮



被劾遣戍明史

楊瞿崧字穉賓晉江人萬歷進士授戶部主事繼奉命權稅臨清關抗疏請蠲稅不報瞿崧蒿目拊膺食寢俱廢復陳商民交困之本源新舊關制之利害灑灑數千言而卒歸罷貂璫廣安稅以復正額時比之賈長沙陞郎中以僉事督學粵東不攜眷不延友單車赴任首功令示畫一尊六經闢邪說正已率先持廉厲屬每校試越宿而揭品藻之精流覽之疾見者驚猶神明卽下駟之牘必首尾徹閱崇雅黜浮莫敢為詭譎以干禁令呼為粵東夫子兩薦卓異轉江西參議造兵器買弓矢葺衙宇建新營皆自出俸金不動公帑擢副使提督江西學政未幾告歸值援遼閩兵擾據龍津極力調停得免生變入崇安俟閩兵盡發乃歸杜門著述丹策自娛尤精於易當事屢薦辭不赴遂卒於三山著有蒙荃易說疑藜易說四書疑說五經疑荃棲霞疑測西霞全集續集西方疑評明文翼統嶺南文獻

採林平菴撰志

林一柱字廷郢同安人萬歷進士司理揚州薦糾綜嚴輿情允協治獄多平反不輕鞭扑歷署三篆清



風颯然分枝應天得士皆名流試湖廣御史疏奏切直請臨朝正綱紀熹宗初年疏數上歷陳養士餉卒名存實亡之弊雪幽忠明功罪至有世運當阨之句留都東京火請復建文廟號劾織造監李實制官虐民必亂天下闡黨側目因請告例轉廣東參政拂袖歸居家以孝友稱及再召而一柱已

卒府志

陳如松字白南同安人萬歷舉人初令蕭山革常例除罪贖嘗自未至酉連判三十五事無稱冤者摘伏如神有被殺者無踪疏邑城隍犯忽自到招抵

直指稱其吏治為浙中第一以忤上官調簡補信

宜旋改河源邑學官為世宦占營私室如松立殿

其室復之有泡泉宦據焉如松曰山川之靈豈供

凶人口腹投筆泉水立涸擢守太倉痛懲豪猾著

有蓮山集語抄學庸解百篇詩老來吟諸稿府志

王宗震晉江人萬歷舉人崇正四年授崇仁令流寇

七千餘犯樂安詎崇百餘里宗震修葺城垣增高

雉牒率其屬及鄉兵二千餘堵截各隘口城外舊

有民堡年久傾壞先期令民攜家入城選其少壯

者登陴協擊賊屯太平市鄉兵攻殺四十餘人賊



乘雨直薄城下宗震矢死固守相持三日夜賊多傷斃圍始解復夜燒長橋斷賊歸路適把總錢象環援兵至兩面攻擊斬其魁王黑豹賊遁去巡按倪元珙叙其功而先為讒者所中坐罷軟落職及覆勘叙功事晉階奉直大夫府志

蘇兆先字爾開南安人萬歷進士授行人擢刑科給事中首陳實求安攘一疏嗣有清仕路保泰寧一疏所彈駁皆借交植黨眾莫敢問者居庸原有軍站扣其月糧備貼過官往來諸費上乞甦邊困以保藩籬及榆關馬弊乞設策稽查疏遷兵科左給

事中有速乘時修禦侮疏又有關門全備而實疎

疏邊關報捷有兩捷慮有兩虞防勝艱於防敵疏

時三殿鼎建有巡工之命兼視軍藏監局摘發奸

胥追還上供燄硝四萬三千餘兩夙蠹頓清陞俸

一級賜白金文綺擢吏科都給事加太常寺少卿

以忤逆璫歸崇正辛未卒於家贈太常寺卿前後

疏章俱載康熙癸丑未成志稿參南安志

杜應楚字翹甫晉江人萬歷進士嶺北登第自應楚

始初授孟縣令廉犴狴出無辜賦稅準條鞭罷絕

一切火耗民饑請賑不待報發倉屆期所貸粟四



千餘石盡來內價開豐稔支河以灌民田築小金堤千四百丈以禦水患捐貲造郭凖梁以濟往來聽斷手自批決兩造成服調丹陽覈胥吏冒金三千餘歸公金沙歲有金二百協郵向充令長應楚舉歸之郵令郵長自詣金沙關給領為丹陽人築壩濬河歷遷郎中出為南昌知府廉慎自持隣郡貴人子發他姓墳而毀其屍篡其地獄久不決以屬應楚片言折之自是疑難大獄多委焉政聲日起後乞休歸卒

閩書祭雲  
臺藏稿

李逢期字維徵晉江人學以不欺為標領以孝弟為

粟帛以整齊嚴肅為終日步趨門人蘇濬嘗持乾坤二卦質之逢期曰乾之學約之一誠坤之學約之一敬誠無不敬敬即思誠乾道坤道一而已由貢生授瀧水訓導有某生不能悅其庶母及兄邑令以文法移之庠逢期召至為講孝弟為仁一章生面頰若無所容歸謝母若兄敦倫如初有萬戶饋及門且善致辭逢期謂廣文擷園蔬足飽不敢以薪水煩將軍力却之擢九江德化教諭權關吏歲以其餘惠多士即以佐庠中年節酒醴之供陞寧波府教授士有與民構者陰召數之曰奈何爾



以小詬蒙大耻令刀筆吏持短長士胥化焉轉鎮海衛學至則捐俸資葺殿廡庀祭器未幾遷吉藩紀善致政歸年七十二卒著有四書易經隨筆記

寧波名宦

舊志參  
三餘集

謝元珧字夏甫南安人天啓進士初令建平水蘗自矢簿書手自裁決催科不假戶胥調繁宣城賦重俗囂胥吏乾沒公帑至三千餘金元珧立燭其奸嚴振刷之宿逋以清有漕艘燬於烽火旗卒逃竄時議以民丁代運人心惶懼元珧力請當事得報罷邑人輯循政錄以誌之擢禮科給事中所建白

務關重大如請慎簡閣臣博求良將謂輔揆當先沃心不宜畛域將帥莫先作氣善算萬全及議裁督役撫兵之方籌邊防海汛之要俱報可一時憚其鯁直遂外推叅議督理粵東鹺務值海寇衝突闌入江門珧詰戎繕器寇以寢平轉浙江副使整飭金衢廢十私監以釋寃民禽天罡會以安反側遇歲饑捐俸勸諭招商發販價平而吏無奸全活數萬計以遷去士民相率乞留臺使者以聞乃晉秩叅政仍留原任衢舊設兵二營以春秋防海汛值海寇劉香奔突珧多方設險賊旋就撫敘功未



上而沒衢人哀之如喪考妣

府志

陳文瑞字應萃同安人天啓進士知吳縣沈幾楊廷  
 樞皆其所取士也吳當漕孔道慮阻凍後期議借  
 民力代運文瑞不可事得寢時部議視產上下募  
 兵充伍文瑞使以家丁隸名民乃帖然洞庭有號  
 天罡者結黨橫行擒置之法散其黨郡紳周順昌  
 罹瑞禍義民顏佩章等數萬人以激憤捽緹校文  
 瑞護周出境復捐俸倡助為輸所誣贓仍撫恤其  
 家至佩章等五人被誅為葬而立之石曰五人之  
 墓吳人有金剛手菩薩心之謠卓異者三致仕歸

年八十四卒

府志

王觀光字子開晉江人天啓進士授舒城令富民多  
 飛米得脫役累貧民觀光總計米額設法派貼而  
 役始均有屠者謀殺其伴屍刀俱投潭中仍自控  
 告亟馳視之蛙跳蓮葉哀鳴使投水驗之屠刀在  
 焉遂抵命一妖男子以婦貌入富貴家事發立斃  
 之遷刑部主事適富商吳守禮家奴吳榮擁貲數  
 十萬投拜魏瑞反噬其主瑞敗繫獄欲賄脫卒擬  
 決輿論稱快陞常州知府有織造歲例八千金革  
 去之又內官多駁緞絹勒機戶造換破費累數十



萬爲牒請貼價得免再造四府機戶皆援爲例宜興魯較肆爲亂燬屋剗墳幾成大變以計擒之餘黨遂戢郡有權相掣肘遂引疾歸以薦起補荊州知府惠藩在焉藩府有紫金山承奉怙勢橫甚懇者盈篋觀光謂爭之不如化之密緘送承奉大驚愧夜出數千人府前後歡聲如沸潞藩與惠藩疏爭墾田數年不決爲調之得平荆故流寇出入處沙市在城外十里許衝要繁華賊殘破者三郡有商稅例歸太守推與倅分掌將所得稅羨建築關城延袤三十里沙草二市賴爲藩屏時流寇日熾屢

召士兵雜民兵吹笳揚幟賊頗膽落而妖人楊大將爲闖賊奸細來謁倨甚自獻八陣圖密授計破之慙阻遁去餘黨尚謀爲亂設備殲焉楊嗣昌督兵駐荆襄請令其兵自饋楊心啣之遂以計典去士民號泣惠藩特疏保留乃回任闖兵嘗以三百人混入荆城托買棉窺虛實悉爲鄉勇擒獻徐諭之曰汝等皆朝廷赤子忍令獨寒第歸告而主無生事開釁遂發棉賣之賊亦心驚過當陽距荆八十里不敢窺半武焉自是登陴設防無虛日以積勞乞休唐王時起戶部右侍郎兼吏禮兵三部事



未幾歸其家訓曰文章須性靈流出品地由淡泊  
做成其學問氣節可想見云

抹周芮  
公撰志

卷四十五終

福建續志卷四十六

人物六

泉州府

明

陳洪圖字敬夫安溪人天啓舉人授龍巖教諭值令  
董汝昌攝篆他邑山賊猝至城門已閉村民逃難  
者千餘人至不得入洪圖率諸生開城門納之勸  
人出米助餽粥難民賴以生活畫計遣健壯出伏  
空呈獲賊魁張崑山等賊勢解散旋復糾眾攻城  
洪圖令諸生率其戚屬并諭民之有力者各出子



第童僕身與之分堞守禦久之援至圍解改詔安  
教諭邑經寇殘破士荷笠敝衣以見惻然曰涼蕪  
固若是耶撫而周之時海氛盤踞經年濱海人多  
脅從主兵者疑其黨逆將勦之洪圖力爭主兵者  
敬其忠信乃曰陳先生言是也人情大安陞建寧  
府教授以老辭歸

府志

陳豐陞字元蓋晉江人崇正舉人授高州府推官至  
三日電白縣典史侯登前杖死錫匠行賄求解却  
之正其罪狼酋韋翅鳴反薄城十里下寨豐陞分  
守北門男婦萬餘欲入城門閉豐陞破鑰入之被

圍月餘家屬環守署中并計城破卽投其中豐陞  
督守五十餘日圍始解署廣州府時郡有梅花社  
皆豪貴子女招輕薄文士入社督學林佳鼎揭送  
兩院事下豐陞立置之法以此獲罪粵人然政聲  
益馳會急徵餉院司議加徵相國何吾騶鹽場課  
銀委捕其家限期認輸軍需以濟有黃錦華者恃  
堂兄相國勢抗不出豐陞將勅印責至黃相國家  
黃懼乃出錦華痛懲之闔府咋舌博羅寇亂制府  
令羅定彭知州爲監紀蕭叅將爲叅謀統兵三千  
往勅乘機焚掠取財劫子女豐陞往治其事兵三



千皆露刃以待豐陞令把總集舟師塞斷港口炮  
 碎其船始不敢動搜獲婦女百餘蕭彭夜沉老醜  
 婦女於水仍挾佳麗者以去直指上其事蕭彭抵  
 罪翰林林兆陽從李賊詬莊烈帝族遁於海豐陞  
 偵知其處擒斬之豐陞居官廉勤膽識兩絕性仁  
 廉未嘗妄害一人輕取民間一粟一絲廣民稱之

曰陳佛

節陳氏家傳

蔡鼎字可挹晉江書生研精易學多發前人所未發  
 星緯諸書獨探其秘言屢奇驗以經世自任孫承  
 宗督師薊遼徵鼎為山海關閣部參謀所至山川

形勢隨時筆記贊襄區畫數年安靜帝賜為白衣  
 叅軍因上疏陳魏忠賢之奸觸怒潛避懷宗即位  
 命繪像訪求復原職辭不拜帝稱為蔡布衣賜茶  
 鼎見國患日深仗策叩闈與時柄鑿竟為所抑激  
 論一書觀者咋舌鼎曰我非時所能用亦非時所  
 能殺所以為此者將以明天下未嘗無人也自是  
 屢揭送政府伏闕陳疏皆極論邊事時不能用乙  
 酉唐王馳詔三聘拜左軍軍師值鄭芝龍跋扈退  
 隱卓岩卒年六十八著有易蔡集解

通志叅經義考沈佺期傳

黃潤中字嗣雨晉江人崇正進士授刑部主事多平



反轉禮部祠祭員外郎會有旨追贈皇五子孺孝  
 悼靈王通元顯應真君一時朝議譁然潤中力爭  
 謂從來但有王號而無道號疏覆寢不行出擢惠  
 潮兵備道時巡撫程珣潛遁其麾下部將練克等  
 劫勒鄉紳將陷城潤中力制之乃止又有大帥吳  
 某日以誅求為令躬詣八拜禮之書一扁懸其門  
 曰急宜勦賊勿擾我民一字一拜大帥感動乃出  
 師勦寇潮民以寧以病告歸道中為流賊所擒搜  
 括筐篋僅獲端研數方賊訝曰爾貌宇非常何囊  
 羅至此潤中曰吾官惠潮祇酌其地一口水耳賊

曰早知是黃觀察何敢爾乃釋之子襄孕圖鞏黃氏

家傳參睢州  
唐四表撰文

洪清鼇字六生晉江人崇正拔貢生乙酉唐王入閩  
 清鼇迎謁語多慷慨王奇之授衡州通判督師何  
 騰蛟深加賞識請改道州知州時蜀寇一枝虎李  
 來亨郝永忠等十三鎮各以所部求奉使稱臣於  
 粵出道州清鼇迎說曰兵所以異賊者畏法受官  
 節制見百姓不敢犯今若縱劫依然賊耳非兵也  
 諸軍皆瞑目獨永忠奇之曰子非百里才行當佐  
 吾軍遂偕見永明王王亦奇之擢都憲監諸鎮兵



駐湖南何騰蛟敗於武岡山被執不食死而閩人  
周金湯曾英等糾衆重慶爲滇黔蔽又爲孫可望  
所破奄有雲貴道塞不通清鼇乃與十三鎮退入  
西山據楚陵夷歸州巴東均州蜀巫山涪州等七  
州縣屯田固守久得永明王安龍信間道上書言  
十三鎮公忠無二今扼險據衝窺晉楚蜀有翼隨  
時而動議者多其功王加清鼇總督兩粵滇黔晉  
楚豫等處地方軍務孫可望與李定國戰不勝歸  
命 皇朝滇黔兩粵漸次底定清鼇十三鎮猶出  
沒荆湘間旣而七將軍分道進攻搗其巢穴李來

亨等縱火自焚死諸軍多潰或曰子未可以去乎

清鼇曰師亡與亡去將何之遂被執諭降不從臨

刑之日神色不變投屍巫峯三峽中

陳大萊  
紀畧

葉翼雲字敬甫崇正進士知吳江縣值歲大旱蝗緩  
征平糶捐俸設粥步禱龍祠日行數里立法驅蝗  
蝗皆墜湖死是歲雖災不害時議者以國帑詘欲  
加畝翼雲條上其不便所省六萬周行城郭相度  
形勢令城內四周皆康衢可馳馬其上增築臺舍  
嘗自戎服閱兵郊外夜復巡行闐闐間北都變聞  
不軌者洶洶思亂翼雲廉得其主名立捕殺之一



邑帖然遷刑部主事乞歸唐王入閩擢稽勳員外  
同安城破被獲不屈死闔門遇害

松陵  
文獻

郭承汾字懋袞晉江人崇正進士授淮安府推官徵  
為浙江道御史及南都失守隨唐王入閩仍以御  
史巡按貴州冰清自矢懲貪禁暴嶽立風行悍將  
奸胥莫不望風而靡會蜀寇渡江屠毒上游七邑  
殺戮之慘雞犬無聲承汾奮臂會定番侯皮熊總  
制范爌協力勦撫經營三閱月始回貴陽收餘燼  
瘞遺骸將為長守計未幾大清兵入閩唐王被  
執粵人別委巡方承汾候代而皮熊范爌因兵情

共疏留承汾護軍聯絡各路辦寇晉太僕兼僉都  
巡撫黔南孫可望遣使詣粵求納款先令李定國  
會盟於龍里承汾與皮熊范爌皆與盟後寇乘隙  
入黔汾與熊爌等抗兵自守貽書諭責謂牛耳之  
血未乾北門之師夜至君父可欺天地神明不可  
昧也遂以兵劫承汾及皮熊於酉陽界執見時眾  
官懾於威皆跪承汾獨挺然不屈詞色皆厲可望  
慰撫之益申言切責可望怒承汾笑曰我頭可斷  
膝不可屈死即死耳吾何懼哉乃令引出羈民房  
中餓九日不死復餓五日死有總戎許盡忠素善



承汾陰志其處黑夜瘞之

採陳蓼崖紀畧

何九雲字舅悌晉江人喬遠子崇正進士選庶常授編脩未第時請所得恩廕讓與季弟與黃道周蔣德璟為文章性命交癸止下第過揚州嚙使喬遠明人馳書相問淮南欲資緣納賄叱之曰奈何以不肖之行辱我故人乎後以貧故就漳平教諭教育薰陶士大興作陞應天府教授金陵士習矜尚意氣每與當道爭多方訓誨士風丕變捐脩文廟刻宋名臣言行錄既登第或謂宜見政府早為地謝曰某平生不敢喪其所守房師周文節聞之曰

何生真品也在翰林中未浹旬而甲申變作以死

自誓侍者曰司空未塋子道猶虧乃即南歸奉召

編纂前後奏疏九雲歸塋父畢杜門不出扁其軒

曰東湖門史自附於龔生范子之後未幾卒著有

採何運亮撰志

何九說字兄悌晉江人喬遠季子以廕授太常典簿

晉太僕寺丞署京營庫藏稽閱營馬中一馬刻去

營號知其必作響馬登記之越日果有首某營印

馬劫客與前馬符劾置之法草斃馬之軍不憚大

僚私人寺庫所貯皆邊儲每差運必會巡視科道



依原解交發一無所染改南京戶部主事管豹畧  
倉篩晒如法先是南糧解役有監候數年不能給  
通關者九說隨收隨給自是解役不至斃獄晉員  
外郎分司水西門往關門諸亡賴率借訪狀為阱  
九說置不問惟取足常額商人德之又以指揮干  
百戶安坐奸賭虛費廩祿不如就中選擇鼓其勇  
氣又添効用名色擢雲南永昌府赴海道卒九說  
性和易無纖吝之習重刻鏡山全集及先世各遺  
稿系以小序往滇至淑浦寄書與兄九雲曰楚省  
山川險固何地不可守武官則統兵搖掠文官則

坐地分贓方知臣子之罪不容於誅亦可見其志

矣

採何九雲撰畧

周斌字平寰晉江人事嫡母張氏以孝稱崇正初海

疆多寇以廩生上策軍門累建奇功官至光祿大

夫上柱國前軍都督府左都督掛干城將軍印御

賜忠孝雙成扁贈三世廕其子文驥入監讀書京

師陷懷宗殉社稷斌奮力討賊移書所部其畧云

男子立志忠勇自期我今討賊誓死報國君能立

志則効命疆場不能寧歸田以養餘年可耳聞闖

賊死我師將至遂慨然曰我之後死者以賊未



討今賊已死吾可地下見先帝矣從容自刎死著  
有會討闖檄文及仁義說皆至性中流出子文驥  
官叅議道

黃岳案同安人崇正初為廣東英德尉四年寇犯城  
督兵戰死英德人建祠祀之府志

郭寅日同安人以歲貢任陝西平涼同知李賊陷城

寅日不屈與二子皆死焉時同郡陳鼎天啓舉人

甲申之變混跡緇黃大兵入城與在籍吳江知縣

葉翼雲死之晉江黃道臬崇正進士陳顯謨邑諸

生聞李自成陷京黃自投於百源川陳謁文廟解

所繫自縊遇行道及學中人救之遂終身杜門

客府志

徐永泰字爾舒南安人崇正武舉叙平寇功授守備

壬午邑有山寇斗棧之變當事檄永泰議勦撫永

泰選數驍卒自隨單騎直入遂擒其魁餘黨悉解

陞都司調鎮江叅將隨晉總兵逆擊叛寇於江奮

力疾戰不避矢石遂死之事聞贈榮祿大夫都督

同知謚武靖賜祭葬廕一子永泰事繼母以孝聞

拓祠宇為族黨倡死事之年三十有六府志

國朝



張天福號咸五晉江人鼎革初聞楚不靖以行伍謁  
康親王於軍次王奇之王欲抵建昌賊將黃某固  
拒長興石峽命天福爲前驅斬驍卒百餘級賊棄  
險登舟天福乘勝挽小舟奪巨艦數隻歸師次吉  
安賊將韓大伍負固不服天福以六十人黑夜渡  
河破壘奪舟江西平從王抵楚克長沙進紫陽關  
由白馬廟直抵滇省經歷水陸百餘戰皆有奇績  
復值羅刹呀克薩跳梁建義將軍林興珠請於  
朝

召見玉泉山賜宴出征歷黑龍江火浣山四閱月乃  
到羅刹恃河爲險擇部下善水者三人潛厲以過  
驅馬百餘歸因識情形用火箭攻木頭城呀克薩  
降捷奏授寧波左營遊擊補海寧參將陞貴州銅  
仁及廣東澄海副將肇慶大饑天福支藩庫銀三  
千兩遠糴近賣設法有方全活數十萬計擢福建  
海壇總兵築塘四十餘里灌田數十萬頃以老病  
乞休越二年卒 賜諭祭廕一子入監長孫煥登  
雍正丁未進士 節家傳  
林維造字用章晉江人學會之子順治初以廕補陝  
西鞏昌知府尋擢西寧副使五年叛鎮爲亂逼降



不從被殺西寧人立祠祀之康熙元年贈光祿

寺卿廕一子知州府志

王鐘鳴字鼎菴惠安人順治戊子舉人授莊浪知縣

承殘破之餘民多流亡鐘鳴招徠撫字不期年版

籍復舊興學葺廟文教一新莊浪西北乃山麓水

出輒漂人田陌廬舍鐘鳴築堤以障水患遂息邑

饑請賑不待報即開倉散粟吏以為不可鐘鳴曰

埃報是索吾民於枯魚之肆吾豈以一官易民命

哉用是醵秩歸康熙間督學覺羅逢泰採其善政

祀莊浪各宦府志

林嗣環字起八晉江人順治己丑進士累官海南副

使駐瓊州性耿介有風裁在任多惠政有馬伽沙

賈船抵朱崖界上主帥利其重貨將執戮之嗣環

曰吾以書生持節海外固欲其來遠人緩荒服也

攘功挑釁嗣環誓不敢為帥銜之究無以奪其議

聽賈人歸國時尚耿二藩並集粵中無餉嗣環議

兵屯種拂二藩意共嗾帥劾之被逮問慷慨力陳

藩鍾不法事由是調耿藩於閩嗣環落職流寓西

湖日徜徉歌嘯於湖山詩酒間一時海內名流如

吳梅村朱竹垞宋荔裳鄒程邨王西樵董爭相推



重著有鐵崖詩文集嶺南紀畧等書

林雲銘題跋安溪志合參

林忠順字遜膚晉江人少孤力學順治己丑進士授

景寧令修學宮課多士蠲徵派革行稅有陳汝文

等以爭業殺伯兄弟姪七命司理受賄欲脫之忠

順執法伏辜雷三霹惡室堂壞地傾失司理懼幾

罹禍歲饑隣寇犯境忠順措練鄉勇與官兵防禦

乘賊不備搗其巢獲賊首馬興魏茂秀等餘黨就

撫以糧累解任民爭為輸刻石立祠嗣補直隸新

城令民疲役繁加意撫綏鞭扑不事功令最嚴逃

人逋匿株連家室為墟忠順申飭邏役多所釋獲

民無波累旋以失出盜案罷甲寅閩亂耿逆召謁

鄭寇措餉忠順抗節匿名深山窮谷間 大師克

復泉郡親王以全節優叙方擬用而歿著有古雷

篇二集詩文史評

採林雲銘撰傳

何承都字玉水晉江人順治己丑進士授刑部主事

越年巡按陝西兩河採訪地方利弊奏 聞鞏昌

營兵侵奪民居擾害良善疏請歸原營興建營房

安插兵民相安營衛各兵多昔日烏合之衆投戈

歸命每窩通大盜剽劫商旅疏請卽營兵定為戍

衛以荒屯令守兵耕種無召募之煩省養兵之費



兵皆土著便於約束稽查又陳省冗員一賦稅定  
軍法議屯鹽協濟彙解乞蠲荒糧及祖軍遺糧請  
給囚糧及赦免叛回株連各犯皆有裨國計民  
生俱報可尋以疾卒有奏疏遺稿節遺稿  
序言  
張汝瑚字夏鍾晉江人順治乙未會試乙榜授清源  
令至卽釐草里役之累羅白二都永濟渠透迤三  
十里歲久淤塞隣封豪右占耕百餘年汝瑚請上  
官濬復之旱澇得以無患白水屯營三鄉沃壤也  
自萬歷初被水後地荒民竄彌望黃茅白葦爲集  
流亡給牛種躬自督墾皆成膏腴地戶戶祝焉補

安陸府通判却例金以千計校士論文所賞識者  
皆名士有奇士艱於庠者爲援例成其美多獲雋  
去解元劉善錫其首拔士也郡邑有水旱爲民請  
命必得請方已性嗜學凡經史子集宋儒諸書靡  
不淹貫著有匏野初集二集賢賞堂文集節鄭重  
高聯璧

撰集  
序

陳有年字孫穀晉江舉人有知畧順治間爲興泉道  
閱蕭幕友海澄公黃梧聘爲上賓未幾耿逆畔梧  
病死漳城守劉豹受逆意將危梧家有年受梧托  
孤部兵殺豹漳郡復寧耿逆又以婚事誘梧子芳



度使至福州有年止之且為蠟丸書遣黃藍至京告急 仁廟問梧子年少誰與謀者藍以有年對命大臣記姓名從優議叙而有年已卒有年在海澄時耿鄭百計誘之不從及將卒猶執芳度手教以死守孤城料後事多奇中著有史懷叅十卷文集三十卷詩集四卷陰符經解二卷子方升舉人

官教授

採林象湖傳

杜輝同安人與弟達康熙二年自海上歸命輝授總兵官左都督銜達授廣東都督銜四年授輝廣東右路總兵官七年缺裁授雲南永北鎮總兵達以

原銜隨兄之任十一年值吳逆反輝兄弟俱被脅

至湖廣日圖歸正密遣人赴大將軍貝勒王軍前

訂期內應謀洩兄弟俱被戮其家屬僑寓廣東逆

平事聞 賜祭葬贈輝光祿大夫達榮祿大夫府志

蔡璋字秉鉞晉江人嘗值吳逆之亂力拒偽檄後以

平臺功屯興國從征建昌大小數十戰擒偽帥殺

之授南昌總兵調撫州克復金谿復勦龍泉廣信

崇安光澤諸郡邑賊所向有功常以數千人破黃

通賊數萬眾以勇聞移鎮順德率軍平蕉島賊賊

遁圍瓊州璋疾馳往救焚其巨艦賊潰登陸與戰



於五指山大破之給被虜男婦數千口資糧護歸  
以勞卒於官府志

黃元驥字德臣晉江人由海上歸命康熙間授南昌  
守值吳逆竊袁臨各郡簡親王帥師屯南昌征  
討四出軍興旁午一切軍需皆倚辦焉擢江西驛  
鹽道師行絡繹官船不敷元驥爲之立法按船給  
粟約以曾載兵一次者後免再應於是民船四集  
有餘船可供商旅百貨流通預備糗糧芻茭俱集  
水次一夕王諭明旦出師第恐糧與舟難倅辦  
則曰已備矣黎明官兵登舟百物無缺時南昌戒

嚴城門晝閉元驥以城中多留百姓無益實用且  
耗米穀乃留壯丁守屋餘縱其他出男婦子女以  
億萬計時元驥以道兼府又攝臬事日議軍事夜  
批文移裁決如流鉅細悉舉擢廣西按察使會大  
兵由粵進滇討吳逆將軍賴塔素知元驥才移書  
總督金光祖委司轉餉入境不赴桂林兼程直趨  
百色宣布德威苗蠻嚮應建議就地募夫充運又  
行圍轉遞運法自竹州塘直抵滇省計里設塘塘  
有目計塘設站站有長一夫斗米一行十里以砲  
爲信逐塘遞接按程交替更番休息先至者別出



賞以旌之前後運糧數百萬日用夫六千六百名  
 於口糧外加賞銀二分人心踴躍叢山疊嶺闢輓  
 運如飛海南軍前數十萬王師咸歌騰飽以至  
 凱捷元驥力也擢山東布政使首草陋規以甦民  
 困登萊舊界外地護撫篆時以海宇既康特疏入  
 告令民歸故居復舊業海濱弛禁聽民採捕民以富  
 饒既罷歸於有司毫無干請著有省齋詩集卒祀  
 廣西名宦子良佐荊州知府孫岳牧雍正癸卯進  
 士歷江西按察使

黃氏家傳參  
廣西通志

蔡仕岳字詒疇晉江人康熙庚申舉人任龍溪清流

教諭立學規定文式激厲士風人文丕變撫軍梅

錫以卓異薦陞贛榆知縣勸課農桑振興學校捐

廉俸以養棄女置瓦棺以收遺骸邑人德之後因

公掛議罷邑紳士為置書院供薪水奉以為師仕

岳少負奇姿書過目終身不忘沉酣羣籍淹貫百

家著古文直道編灰餘編辨論經史上及天文歷

象皆得其精奧又有集騷集楚四篇孫勳為之序

蔡氏  
家傳

李鼎徵字安卿安溪人光地弟康熙庚申舉人授嘉

魚令瀕江蘆州課幾當賦之半五歲率一清丈官



吏借以漁利鼎徵毫無所取增豁各廉其實嘗與  
隣邑江夏議修堤事夏人諉卸謂堤乃嘉地鼎徵  
邀夏令至堤上指彌望墟墓曰此纍纍者隣比於  
茲堤一壞皆湮入巨浸中寧不垂憫歟夏令亦惻  
然歲修不廢宣尉司田舜年爲子所訴議者欲以  
叛奏討之鼎徵上書當道寢其議入爲戶部主事  
遷員外郎告歸家居十餘年年七十五卒著有四  
書易經集說中庸集錄待繹數十卷子天寵鍾僑  
俱官翰林院編脩鍾禮鍾旺舉人

府志

蔡方升字貽東晉江人康熙甲子舉人授興業令其

地狼狽雜處有北馬洞素爲盜藪民苦之募丁壯  
搗其巢擒其魁害遂息丁外艱起補任邱邑當七  
省孔道舊設十二鎮輪辦糜費不貲至卽草去自  
行辦理歲省民間數千金每歲行幸趙北口水閘  
舊亦派十二鎮幫辦悉除之竭力供應不以累民  
大水淹田廬民請開堤洩水河官持不可方升曰  
設堤原爲民利今壅水不洩反爲民害開堤吾獨  
任咎遂洩之民得安堵水涸補築堤完如故有周  
姓被命案株連讞明釋之商挾白金五百來謝峻  
却之歷署青縣文安阜城三邑皆有政聲以疾乞



休民攀留建祠祀之歸九年著有易解參考春秋  
四傳折衷同異蔡氏節畧參  
二希堂文集

黃煥彰字愧淵晉江人康熙丁酉解元戊戌進士改

庶吉士雍正癸卯順天鄉試同考官散館授檢討

遷禮部郎中奉考 至聖先師聖誕覃稽精覈謂

家語所載十一月庚子即今八月念七日定議

題允著為令典出知澂江府郡有官庄百餘畝歷

係佃丁賠糧煥章以官莊官輸立除積弊捐俸築

河陽縣海口牛舌壩以資數邑灌漑時行開墾之

令州縣競以多墾博羨遷飭屬縣據實舉報勿貽

民累後滇省丈量四出而澂江獨免郡有東山土

司眾議改土歸流煥彰謂東山為魯魁鎖鑰土州

判王氏世守其地諸夷懾服裁去恐夷性難馴控

制不及不踰年魯魁騷動震及普元二府獨東山

一隘伏莽無侵內補刑部員外郎中夜治獄遇冤

者輒擱筆欷歔一綫可矜即色喜尋轉郎中卒趙節

北平  
撰誌

陳元煥字章士晉江人以明經授行人司正遷刑部

員外郎凡有讞疑上官皆報可陞兵部職方郎中

清戎政屏饋遺出守威寧當黔極邊苗性頑悍訟



訴繁積元煥平恕剖決不徵賄徇私苗遂帖然蜀  
中土司虐其下羣逃至境土官聞於臺委監司會  
鞫密行重賂求遣衆還元煥謂歸受荼毒恐激變  
不如便宜安置之監司不能奪郡士鮮知學歷元  
明數百年無登賢書者公暇集諸生課文親定甲  
乙文風始振以疾卒於官民哭奠數十里著有柳

亭文稿

府志

劉作梅字和少惠安人康熙辛未進士授山陽令值  
河決開倉賑貸設廠施粥招集流亡於寒士尤加  
卹邑有孤夫歲夫二累派夫者明季河溢暫派牙

僧丁夫應丁其名登籍子孫歷數世不能免作梅  
具文請豁歲夫者歲治河權宜召用後竟成例役  
至二十餘人糧盡歸取河員卽報逃曠催檄如雨  
作梅爲查河南歲剩裁扣銀募夫應用永除夙累  
聽訟多平反俗輕生乃訟因小忿投繯溺水動以  
命控株連無算作梅當場劈誣結案邑多盜依附  
權蠹盤據莫能詰有橫劫者借河役名色盛裝驟  
馬罔所避忌立擒治之權奸股栗尤留心學校立  
義學置義田文教大興卒於官士民歛錢治其喪  
哭送歸櫬祀鄉賢

府志



蔡仕舳字詒霞晉江人少聰穎好學持身嚴正登康熙癸酉賢書授魚臺知縣邑故洿下多河患至則力為疏濬野無漫流東省素苦蝗捕撲之役民困供億仕舳謂捕蝗救民寧以累民損車徒挈榼而往自後即蝗不為災邑賦歲二萬餘民多逋負為每兩裁減火耗五分民便之治八年巨盜就法逸囚自至行取試刑部廣西司主事提牢三月囚糧必親嘗遍給獄無瘦死陞監察御史擢工科掌印給事中出督浙江糧儲道奏減漕規舊例年二千九百餘兩請寬追扣漕丁積年侵支工食署按察

司奏免監候死囚逐年解審承辦銅勛事竣以節省銀四千六百餘兩解送藩庫署布政司覈餘米三千七百石隨以僉都御史署浙江巡撫出耗米充辦科場增築海塘通省利賴嗣以失察書吏解組歸藏書萬卷時手一編越六年卒著有奏疏及

藐邨詩集若干卷

節彭維新撰志

江之煒字原闇康熙丙子舉人授南海令案無留牘獄多平允改元和調嘉定兩縣積欠七十餘萬寓撫字於催科不事扑責而逋賦以清民獲安全所轄寶山縣私鹽多案株連無已請就已獲犯審理



全活數百其俗停柩郭外朽骨堆積為買地施棺瘞埋之以年老致仕歸年八十九子樹第雍正癸

卯舉人文習乾隆癸酉舉人

府志

劉奇齡字稚玉晉江人康熙丙子舉人少好施與任

澄邁縣草免漁課羨餘詳寬鹽堀崩墊脩葺學宮

請增歲科弟子額丁酉海颶壞堤民多露宿奇齡

戶給銀為治屋資捐俸脩堤邑人德之辛丑臺灣

蠢動有避難廣民三百艘直抵澄邑放鶴山營弁

懼將擊之奇齡請驗為脩船使各歸其邑時有二

船飄入他邑皆被刑禁聞奇齡所措置皆釋之先

是澄邑大饑而上官徑以年豐奏聞奇齡力爭平

糶設男女廠煮粥賑饑疫死者為塋之上官甚焉

遂以糶穀逾數罷民遮道跪送三宿乃出境

府志

李光坡字耜卿安溪人光地弟五歲與伯仲叔兄俱

陷賊壘脫難後受學家庭喜讀秦漢以上書乃次

第治十三經昌黎全集濂洛關閩之書旁及子史

質不甚敏以勤苦致熟復專意三禮積四十年融

會漢唐註疏詮成三禮解遂棄科舉業授徒講學

一以明白易曉為教旋入都與兄光地講貫尤篤

著性論三書反覆辨論於理氣先後動靜訂近代



名儒講論之差及歸光地貽以詩曰後生茂起須  
家法我老棲遲望子傳蓋念繼述其學無有過於  
光坡者光地嘗論東吳顧寧人與光坡皆數十年  
用心經學精勤不輟卓然可以自通於後三十年  
來罕見其人

**聖** 祖嘗詢學古通經之士光地歷舉李顒梅文鼎等及  
光坡對 御書道通月窟天根裡人在清泉白石  
間對聯以賜雍正元年舉孝廉有司以光坡應已  
寢疾矣光坡性至孝父病篤禱天焚香掌爛不自  
知毋老多病日侍寢房親喪十旬內止飲勺水終

身哀慕卒年七十二著有臯軒文集周禮述註子

鍾份

府志

陳元焱字淡士晉江人康熙丙子與從兄元焯同登  
鄉薦授廣宗令邑有巨棍姜姓久結猾胥黨惡害  
民立置諸法豪右斂跡商某被盜誣控良民株累  
甚多元焱密訪真盜一鞫卽伏無辜得釋上官知其  
善折獄凡疑難大案咸檄會鞫稱明允焉邑舊  
有陋規吏掾爲奸一切罷却衙齋有樓爲妖狐窟  
宅人莫敢登爲文檄之妖遂絕時當麥熟鄰邑蝗  
蝻蔽野獨不入境輿人頌曰狐遁跡蝗絕踪治行



感物有陳公遷部曹聞父疾急歸父歿廬墓不仕  
年六十四卒子熙塙孫國豪並登科節林枝春撰  
志叅家傳

楊宗澤字陶甫南安人康熙丙戌進士授中書舍人  
以父老歸省年餘嗣補延安府同知分防西延勸  
墾弭盜倡學勵士治績懋著署府事草陋規飭風  
俗時大師西出靖邊捐俸招集農戶屯田庀田具  
給牛種軍無庚癸之呼延之神木介西域雜居互  
市常旅寓城中狡而難制宗澤設籤置各城門使  
持以入顯示以往來不禁實陰束之使易識別韓  
城素患河決為築塔岸側以鎮水勢河流忽東徙

涸出地十餘里墾田數百頃民受其利商州距華  
州數百里就試維艱設考棚建廨舍以試士後遂  
為例士免跋涉人文日盛以老告休卒年六十六

彭維新  
撰誌

何秉忠字禮尚晉江人康熙丙戌進士授昭化令昭  
化瘠邑輸課必俟賣絲徵迫則以未繅繭質錢加  
息幾倍名為砍絲秉忠請緩其期以待隻絡西關  
桔栢渡水流湍急歲數溺人秉忠投牒於水終任  
無溺者以最擢部曹入都需次卒著有管蒯集子  
振會鼎鉉舉人府志



李鍾倬字世瞻安溪人光坡仲子九歲能詩文見渾天儀卽曉星衣度次指証周天印合不錯以康熙癸巳舉人授遂安令訊鞠矜慎有村愚鄭四生爲人傭役贅其婢婢以不受勞苦服毒死四生誣控其主鍾倬按驗無傷薄懲遣之上官欲以奴証主置之重律鍾倬哀其愚力解得免邑舊有馬義堰溉田數千畝適洪水崩圯鍾倬相度形勢遷避下流親董興築遂得永固邑民賴之著詩文若干卷

府志

施世驃字文秉晉江人靖海侯琅子以從征臺灣功

授叅將從征噶爾且擢臨清副將升定海總兵官擒巨盜江崙伏兵商船中誘賊悉俘之陞廣東提督調福建水師父子節鉞相繼時以爲榮康熙辛丑臺寇朱一貴煽亂世驃聞報卽遣將據澎湖扼賊吭遂登舟抵澎與總督滿保軍會命守備林亮遊擊林秀等爲左右先鋒攻鹿耳門燒賊船大小十餘時海水驟漲八尺我舟並航而入破安平乘勝克府治臺灣平捷聞 賜袍帶是役也以六月興師七月克復與其父琅先後平臺期悉符卒贈太子少保諡勇果蔭襲騎都尉

府志



周文驥字龍友晉江人康熙時以員外郎隨平廣西  
招服僞公及僞將軍郭義等十萬餘衆題授叅議  
道又招服僞將軍黃明等大小眷口三萬餘粵西  
遂平歸里後見圍頭沿海等灣網稅雜等項民生  
日瘁身赴制府金鉉請豁至今民賴以安著有約  
軒詩集及篆隸草書數本

節家傳

陳善字孫敬晉江人以明經効力長沙叙功選授上  
海縣有唐才秀者殺人叛誣廉問得情扳繫盡釋  
奸民張恢事發逃匿波累甚衆緝獲置法悉免株  
連孝婦張氏孀守養姑姑死以身殉夫族誣氏兄

張玠迨妹謀貲立白玠冤申獎孝節有逆僕二人  
操舟害主以盜聞善曰汝主被害汝二人何在  
曰某見盜卽奔避一日某奔不及并被傷問盜何  
操曰利斧驗僕傷詰曰盜乃持剃刀耶何痕長而  
傷淺也僕語塞服辜泣任九載決疑雪冤有神君  
之號邑賦重民因寓撫字於催科民賴以甦以親  
老乞養服闋補興寧令威惠兼施民徭感服告歸  
年八十四卒

節家傳

蔡賓與字尚三晉江人康熙乙未進士授長寧令勤  
撫字除陋規擒渠賊鍾選一窮其根株地方以寧



武生陳上任逐催工鍾巨也巨也偽為兵冊劄付  
置其家首以反叛株繫數百人賓興訊得姦孽及  
其弟年也代書冊劄狀置之法無辜盡釋邑自明  
萬歷建置以來從未發科創建義學延師切劓隨  
有邱上峯獲雋旋登甲榜自是接踵平遠鹽徒越  
界販私商困課缺請歸官辦課設法緝私商民兩  
便癸卯文武闈分校所取皆得人兼署龍南定界  
兩縣治一如長寧在任八載民愛而畏之陞虞衡  
司主事送者塞途後補禮部主事

世宗憲皇帝特改刑部初授四川司主事遷廣東司員

外郎覆核直省奏讞准駁俱中窾要陞驗封司郎  
中時曹務殷繁清釐辦理人不敢干以私乾隆乙  
丑分校禮闈所得士稱一時之俊掌銓七載公愼  
自持念父母窀穸未安陳情乞休歸則遍走山麓  
卜吉營墓當事延主梅石書院講席諸生敦行論  
文手畫口講自為程式學者宗之年七十四卒

氏家傳

陳萬策字對初安溪人居晉江庶子遷鶴第三子幼  
讀書三過成誦九歲曉星平易數具有神解康熙  
癸酉舉順天鄉薦侍父京邸相國李光地極相器



重與之講究經學及律法四聲六書九算莫不該  
 貫協光地分脩御纂周易折中創為啓蒙諸圖  
 多前人所未發又分脩性理精義及欽定詩經  
 傳說彙纂戊戌成進士選館後卽充武英殿纂  
 脩每以著作被知遇授編脩  
 世宗御極祭告典冊碑版高文皆出其手由中允洊陟  
 詹事府詹事甲辰典試湖南丙午典試浙江所得  
 皆知名士其往浙也給假歸里時八閩洊饑向當  
 事為民請命先是萬策在京每奉旨密奏必悉心  
 直陳在湖南會條列地方事宜皆報可至是當

事憚之劾以誇耀里閭降授檢討尋除司業歷侍  
 講學士教習庶吉士窮年披吟老而不倦雖病中  
 手弗釋卷為國子師及教習時講授體裁指要具  
 有成法後學仰為山斗年六十八卒於官著有館  
 閣絲綸二卷近道齋詩文集八卷子冕世冠世旭  
 世名世皆舉人知縣孫科捷由編修歷諫垣徐本撰志  
 李倪昱字爾貽晉江人康熙庚子舉人雍正丁未明  
 通榜授永福教諭調諸羅辛亥北路諸番梗化奉  
 檄招安單騎深入虎穴閱十有二旬遍諭阿里史  
 朴子籬巴荖宛獅頭獅尾描著大甲東大甲西八



社畚耆傾心歸順擢青浦令捐俸重新文廟集士  
 月課時遭歲儉道殣相望倪昱加意撫字煮粥以  
 賑全活無算捐資疏濬天寧庄河渠七處調上海  
 邑襟泖湖通閩粵劫掠時聞嚴行稽查遇報盜輕  
 騎履驗得實捕置之法其結黨鬪者懲其魁餘悉  
 解散聽訟定讞不假書吏條銀漕米十餘萬不事  
 追呼輸將恐後嗣為讒者所中解組兩邑人士攀  
 轅卧轍事白歸里郡邑長延主溫陵書院年七十  
 九卒著有梧峯試草

陳大珩撰志

李光燠字廣卿安溪人日烜長子弱冠嗜書篤學月

六經史策諸子百家宋儒遺書皆披覽融貫康熙  
 辛丑成進士選庶常授職後請終養尋還 朝復  
 充一統志館八旗人物志纂脩乾隆元年進三年  
 喪議

上深嘉之時朝臣以宿學者儒薦出督山東學政摺  
 奏兩闈春秋合題大悖經旨春秋四傳並宜習不  
 獨宗胡文定又以四氏學宜徧習五經不得專以  
 毛詩取中奉 允行刊宋儒論學要語頒教行教  
 經之條以教士甲乙文字必根極於經獎勵生徒  
 諄諄如不及士習翕然擢司業纂脩三禮義疏光



輿繙閱疑難考訂同異常至夜分不輟越五月病卒年六十九著有考工發明二李經說潘餘文集詩集長子元善辛卯同榜舉人

府志

黃允肅字元靜南安人雍正癸卯進士授廣昌令邑屯田九千餘畝旗丁魚肉佃民爲勘明坵段四至酌定租額給俵帖佃帖爲據佃不得匿田吞租丁不得額外多索自此丁佃相安舊時地丁正賦外有兵折兵米兵糧耗費飯食茅竹折色物料賠亡籽粒各項差役莫可究詰請分徵並解併正雜爲一條立易知單分發花戶總納通邑三萬餘戶歲

省擾費千餘緡築平西壩以遏城西水患捐脩文廟清理學租暇則詣明倫堂課士論文聽訟無留牘同城都司練兵過嚴營兵蜂擁欲爲亂允肅查記叛兵姓名馳諭禍福皆感悟謝罪九年行取以主事需次適有廖玉書因爭山殺人買族人代承鞫實申臬司勒令改換供招執不從作告城隍文自誓臬司聞之大怒以他案罷職南安知府游紹安聘爲道源書院山長以疾卒年六十八士人設主於書院之鶴鳴堂以祀焉嘗獲寧都縣越獄重犯寧化縣造賭具幕中喜有加級之例擬通報允



肅曰我加二級同寅去一官矣亟馳報協捕得免  
議以剛直取忌時咸惜之著有東山文集周社試  
草澄源拙草萍遊偶記并文集

雷鉉撰志 參家傳

李清植字立侯光地孫光地奉修周易折中性理精  
義

聖祖諭舉所知分纂以清植同諸賢應詔雍正甲辰進

士選庶吉士授編脩巳酉典試江南逾年補中允  
遷侍講出督浙江學政首以經術課士崇實黜華  
啓牖學者悉從有宋諸儒梯航六經汲汲如不及  
以保舉失人降級歸乙卯清植與徐用錫同時

命補翰林院侍讀陞右庶子 御試一等擢少詹充

三禮館副總裁陞內閣學士兼辦經史館事尋晉  
禮部左侍郎以病辭不允未幾卒其遺疏畧曰惟  
願我

皇上益崇惇大之治彌厯如傷之懷法令已極周詳  
毋以細碎科條啓繁苛之漸臣下但取忠實毋以  
承順趨走開緣飾之風閭閻之民力日瘁飭外吏  
惟重撫循而毋滋騷擾草野之利源漸竭戒計臣  
宜崇大體而毋盡錙銖其言不及於私忠愛惓惓  
與光地如一轍云

府志



陳大珩字元臣晉江人雍正甲辰進士授臨漳令邑  
苦河患濬百陽萬公晉濟福惠四渠俾積水入河  
增廟橋梁隄岸道路漸次脩治旋陞中書科舍人  
擢儀制司主事司中文稿多出其手議加永春州  
學額入泮十八名武生十五名辛酉典試粵東隨  
擢浙江道御史所取士皆得人陞吏科給事中在  
臺垣二年餘所進經史解九篇洞徹古今發南書  
房選刻其奏疏彈劾封駁悉中體要如督撫藩臬  
宜久任揀選京員考試御史翰林等官罰俸分三  
年勻和禮部司員非科甲改補別部又奏湖北巡

撫另簡賢員不必復用許容皆荷 允行其發部

及九卿議覆照行者則請停文武互試諸積貯出  
借免息平糶不得派買臺灣米穀接濟漳泉官弁  
不得藉盤驗需索繳銷舊印截角漕米不應改折  
革代考滿州同知張永煦江浙米穀視豐凶通阻  
不可槩禁出港在京書吏飭改原籍也其覆不行  
者則加五經中額春秋仍出單合題改教知縣免  
引 見博學鴻詞科勒石題名國子監也陞太常  
寺少卿丁內艱抵家喪葬既畢脩族譜營家廟置  
祀田建牌坊於戚友多所分潤集耆紳於後樂園



為洛社會年七十六卒著有荀涓內篇宰鄴治譜  
恭和詩臺垣奉章進 呈經史講義文集詩集子

金涵通判金駿知縣金鳳國子監典籍金宣乾隆

庚午舉人

莊有恭撰志

陳高翔字子搏晉江人雍正丁未進士授營繕司主  
事轉職方司兼管車駕司事書吏有舞弊者向例  
因循獨執法杖之一時肅然旋授山東道御史疏  
陳吏刑二部應更革事宜其一謂 聖主以孝治  
天下停外官在任守制之例而丁憂服闋之員赴  
部銓補守候數年非所以教孝請將月選補班於

原班再增一班俾免壅滯遂著為令又因兩廣總

督奏請發帑交商營運辦疏陳義利之關侃侃數

千言他如請除朋銀解部以紓民力武科外場未

優策論傑出者酌發中額以收人才飭禁囤積須

嚴查奸戶不得藉耕穫稍餘之家需索擾害皆有

關於政治大著直聲轉江西驛鹽道却例金平鹽

價商民均便晉山西按察使時有兩大獄 命少

宰楊嗣璟往按高翔將案情窺曲疊疊力陳奏當

平允調江蘇又調廣東海疆多重案益矢精勤有

匪奸自首議者欲概置重辟高翔請誅其魁而脅



從者量與未減言之至於涕泣撫軍嘆為仁人君子以積勞得病歸年七十五卒

節家傳

陳亮世字南志萬策從子康熙庚子舉人雍正丁未登明通榜授閩縣教諭庚戌捷南宮選庶常改工部都水司主事亮世夙嫻數學於算法諸書考究精確凡有鉅程大役料估銷算不差銖黍即極老練供事遇有疑難必請指授而行尚書魏廷珍嘗曰昔吾與詹事公同受算學於梅勿菴先生陳君師承有自其於理數精蘊確有深造彼銷算特餘事耳旋陞虞衡司員外郎遷稽勳司郎中凡應選

應補員缺詳加察核矢公矢慎年六十一卒於

節家傳



福建續志

卷四十一

漳

州

府

福建續志卷四十七

人物七

漳州府

唐

陳詠字正雅龍溪人鄧子也幼有識趣年二十四觀  
 察使試耕戰之法薦鎮龍巖輯安士卒刺史鄭昌  
 仕表其器可比仇香乞為京兆別駕常袞召之力  
 請外補授汝寧錄事轉恩州叅軍奉表至京京兆  
 尹黎幹請於朝曰陳詠酬酢如鐘含音大小隨叩  
 如水待汲方員隨器彼雖不銜於人人自難捨於



亦建紀元  
卷四十一  
彼乞留府攝治中事上從之遇朝廷籍元載家禍  
幾染詠既辨明奉命招撫西蜀權攝京兆事令行  
禁止長安僚佐推重旋補光州司馬二十餘年守  
職無玷染疾乞致仕

縣志

宋

楊承祖字慶襲龍溪人汝南之孫也弱冠通百家尤  
工於詩以祖澤補官初調邕之理曹斷獄得情再  
調循州推幕於郡政多所裨贊帥雷孝友舉承祖  
自代改知安溪縣勞心撫字去日邑民遮道擁留  
及倅循陽父老迎謂曰是前日清嚴推官也攝守

惠陽至代饋遺一無所受廣憲王泂首以廉吏薦  
除知新州祈雨輒應帥洪伋辟守恩平復改梅州  
赴闕奏事極言二廣便宜上嘉納焉年五十丐祠  
歸築別墅於保福隆壽兩山間扁以福壽林塘有  
荷十里扁曰歸耕與諸賢爲真率會幅巾蕭散恬

如自樂以終

閩書參  
縣志

顏幾字子治歷仕多在海外以安黎蠻有功就改京  
秩海外諸洞剽掠昌化軍幾討捕之悉平詔改昌  
化爲南寧因命守之就除瓊管安撫奏變差役爲  
催役及請舉士照四川例與殿試陸等推恩士民



懷之立祠焉

顏世居青礁原屬龍溪今為海澄人

林士蒙字子正龍溪人父昌篤於教子士蒙以周禮

三預鄉書登淳熙進士初調歸善主簿再調梅陽

推官廉以律已嚴以馭吏法禁惟懲狠鬪之民三

載如一日民甚德之改秩知東筦縣

縣志

姚東字明仲龍溪人慶元進士調長溪主簿適大旱

惟東禱即雨民喜曰主簿雨也令丞解被火獨簿

解存人以為誠愛所格再調保昌丞憲臺知其廉

介屢以疑獄見委囚不敢欺以通直郎致仕

府志

明

王昇字日初龍溪人永樂進士選庶吉士授安福羅

田令俱有惠政補平涼府推官陞大理評事歷左

寺正多所平反宣德五年擇廷臣李驥等二十五

人為郡守奉勅以行昇以楊士奇薦知撫州政以

惠利為本重學校興禮教年饑捐俸賑濟全活數

千人九載當遷部民請闕借留朝廷乃進昇正三

品階使復任以從民望二年以疾辭歸初昇為郡

庠教授陳思賢被逮赴京以金寄昇無有知者思

賢死昇遣人齎金歸其家

明史叅縣志

顏寶龍溪人永樂進士授行人陞戶部員外寬猛得



宜奏除詭名田糧九百餘石復申除鄉民鹽鈔一十二萬餘貫尤加意學校新其廟宇至於橋梁圩

縣志

劉銳字伯剛龍巖人永樂進士授行人陞戶部員外郎居官清白乞恩歸省適沙賊鄧茂七作亂其黨侵逼龍巖衆欲逃去銳諭以討賊激以忠孝相從者數百人時郡師適至進與賊遇不利退守郡城銳獨率衆力戰被執罵賊不屈以死

王玘字宏璋南靖人正統進士授禮部主事歷戶部

員外郎監督淮安糧儲出納維公而同事中使欲擅權侵利玘按其事將劾之中使懼而止遷郎中擢雲南右叅政未仕以親老乞終養少歿哀毀成疾而卒

閩書

俞文字懋學漳浦人正統間應貢入國學遭喪歸時閩寇縱橫村落居民皆入城邑文獨爲父治塋西峰之野會大帥統兵至儒冠謁轅門盛言王師弔伐請戢兵無暴掠帥然之景泰初授常州照磨廉介正直監司有疑獄檄文治之民有夜懷金入謝麾使去卒亦未嘗以語人督漕徐淮間峻却常例



金以老乞歸吏民醵金為贖文覓小舟夜亡去鄉人號正菴先生

閩書

陳鐔字日宣漳浦人景泰舉人授太原通判清慎自持督兵民守禦邊境與士卒同甘苦民立石頌焉陞徽州同知改巖州案無留牘民無冤訟以廉能聞年七十致仕

府志

陳負漳浦人成化進士授工部主事陞員外郎監濟寧閘並督北畿山東河務俱以才幹稱宏治庚戌沿邊告警軍糧匱乏乃改負戶部郎中奉勅往督之負催督有方應期而辦陞貴州叅議時都勻寇

起當道命掌司事繼發及時糧運不絕軍賴以濟賊平以疾乞歸卒

府志

許潛字時昇漳浦人

府志

詔

成化舉人知樂平縣加意

學校招撫洞獠以命戍守聽斷公明訟簡民服而囊無餘積卒於官子判孫選俱舉孝廉筮仕以清

白世其家

縣志

杜表字廷標平和人宏治舉人知金谿縣清慎誠慤愛民如子正德壬申江西巨寇攻城表樹木柵募勇壯設方畧與民死守之邑賴以全後補海豐加意撫綏流移復業遷廣東都司經歷以母老歸養



卒於家

府志

吳玘字子瓌龍溪人宏治進士授撫州府推官有折

獄才每公出暴糧白隨不勞百姓不干名譽十年

不得調及為御史有言敢諫有古諍臣風巡按山

東卒於官

閩書叅  
邑志

王龍字虞臣龍溪人

曾孫宏治中以貢授四會縣

丞民有叔姪訟者令具衣冠行家庭禮因感泣悔

罪邑民化之隣邑開建多盜當道廉其能檄署篆

龍設策平之招撫逃移復業者數千人擢知英德

縣尋補乳源捐俸脩學歲饑出粟賑民全活甚衆

邑有虎患龍為牒告城隍虎不傷人年七十致仕

龍弟澤梧州通判當道累檄採大木勘坑冶調度

戰艦兵餉事畢舉以勞卒於官

府志

張觀字國賓龍溪人正德舉人授休寧訓導以材望

知柳州執法嚴明存心寬厚時民苦旱觀自責躬

禱甘澍隨應歲饑發粟賑之境有巨寇設法捕治

州民獲安內艱歸絕意仕進居家孝友睦族母死

貧不能喪郡守孫公裕給地捐貲助之

閩書叅  
縣志

楊表字汝中龍溪人正德進士授南京戶部主事陞

本部員外郎中督賦湖廣擢知長沙雷州二府興



學校表節義澹水利嘗作文以祭城隍猛象為之  
出境郡人異之陞浙江鹽運使浙人稱之曰三十  
年來鱧司廉官楊公一人而已歷廣西叅政以憂  
歸凡不履城邑以廉介終其身府志

鄭復字一陽龍溪人正德丙子與弟臨同鄉薦授嘉  
興訓導師範端嚴學使者器重之命主五經院長  
歷任樂清樂昌瀧水三縣尹清以律已惠以愛民  
尤執法不撓無所阿私秩滿歸林居二十年教授  
生徒躬耕自給所居不蔽風雨晏如也弟臨歷南  
城麗水知縣亦以清介聞閩書

張賀字國儀龍溪人正德舉人授寧海教諭遷松陽  
知縣政尚簡肅不為煩苛脩廟學建橋梁節公費  
均徭役聲稱蔚起丁父憂歸築海堤以興民利及  
倡募義勇以遏流賊鄉人賴之服除補景陵縣甫  
半載以忤當道改永州卒於官祀松陽名宦縣志

黃玠字孝徵龍溪人嵩之曾孫正德舉人授漢川知  
縣平巨寇陳大經等民賴以安再知平樂旁邑民  
饑發金助其賑濟全活甚眾遷石屏州知州陞魯  
府長史匡輔以正陳政要十事立宗約三十六條  
王敬憚之乞歸居家敦倫睦族為鄉邦所重閩書



陳令字汝申龍溪人正德舉人爲廬州別駕爲民興利除害以剛直忤上官調江西斷事尋判潮州值漳大饑資潮粟以濟潮民閉糶甚嚴力請於當道開其禁漳民賴以活者無數羣勒碑於縣門及致仕修墳墓建祭業立大小宗祠設義學以訓鄉之子弟卒祀廬州名宦令有子曰順之知荆門州亦以廉能著

閩書參縣志

林功懋字以謙漳浦人嘉靖進士授東莞縣才識明敏遇事決斷嘗委權番舶峻却私賂有巨寇許桂旣降而恣斃之於獄陞南京戶部郎擢知贛州府

時巡撫朱公統操法嚴切功懋濟之以寬張弛得宜旋遷四川副使備兵松藩有邊將何卿恃功驕恣懋以法繩之遂致蜚語告歸十餘年隆慶改元起補山東副使歷廣西按察使未行卒於官

閩書參縣志

吳宗熹字伯焜南靖人幼稱奇才嘉靖中成進士授海寧令以儒術飾吏治拊循惠愛獄訟衰息然性醇實不能伺上官竟爲所中改教景州尋遷國子丞再遷工部主事屬脩九門城工日手一編工竣而詩亦成帙出示客笑曰此吳司空城旦書也辛



卯主試粵西所錄多名士抵家而卒年方三十二

閩書參  
府志

林策字直夫漳浦人嘉靖進士授蕭山知縣有聞家  
堰北捍浙江內引湘湖爲田數萬頃舊築以土輒  
壞策悉易以石立法蓄洩蕭人永利政暇則進諸  
生講道術課文藝陞大理右評事轉寺正遷江西  
僉事丁父憂歸卒於家

閩書

林京龍巖人參政瑜之子沙寇之亂京與同邑王元  
弼謀請師要其去路至龍門上坪京遇賊被執脅  
使下拜京瞋目罵曰恨不磔汝萬段吾頭可砍足

不可屈京子綬跪請曰父老且病足疾吾當百拜  
以代父京叱曰人生當知順逆敢爲苟免以虧忠  
義耶賊怒父子俱死焉

府志

王命爵字仁卿南靖人嘉靖舉人父爲饒賊所擄命  
爵入賊巢求身代父賊感其孝兩釋之初授密縣  
教諭遷廬江令草馬稅却常例金遷南京兵馬司  
以治獄不冤擢韶州同知從征羅旁築西林城有  
功權南雄關稅一塵不染以薦加四品服俸益異  
數也陞兩浙鹽運使調河東積羨悉歸官帑歲歉  
捐俸賑饑所全活甚衆致政歸家年八十卒稱貧



以殮無媿古廉吏焉

閩書叅府志

石應岳字鍾賢先世以武功爲龍巖所百戶應岳始習儒業隆慶中成進士讀書中秘歷戶禮二科給事中擢禮部都給事首疏請祀大儒陳真晟於鄉經筵請史官入直應時登記得失又廣宗藩之便宜節尚方之賚予急脩省之要圖凡十餘疏其論科場事謂典省試宜用京朝官後因爲例秩滿陞太僕少卿嗣長南京太僕馬政倍肅晉應天府尹會海忠介瑞爲御史大夫相衿契都人有總憲清似水京兆白如霜之謠改順天府尹值潞藩就國

所部驛騷應岳主持其間公私便之奉勅留京提督操江協理院事擢兵部侍郎東南倚爲長城已復名爲戶部侍郎應岳乞終養不許會言官有劾之者遂歸應岳奉身甚約處世甚溫未嘗以意氣加人里居謝絕塵務郡國吏卽之不知其爲公卿也家甚貧沒無餘產著疏草文集

閩書

蔡方平字君衡詔安人少孤時出外教授負米以養其祖母及母萬歷初以貢爲淳安令歲饑民嘯聚方平請上官發倉賑之乃安集先是邑有流人誣伏盜更數令無異辭方平得其寃狀遣之然竟以



廉左遷卒祀淳安名宦

縣志

韓濟字克濟龍溪人萬歷進士授工部主事覈物料督戎器却常例金出守河南政尚平恕至持法則守正不可奪潞藩請地力止之宗室祿米有虛糜及屯糧宿蠹者悉為釐革歲饑開倉賑焉後補武昌擢湖廣副使理蘇松常鎮四郡糧儲兼督支河省費巨萬時有為蜚語誣諸貴游集亡命將為變者當道急索按之株連鼎族濟力持不可曰是輩無反跡不宜深求久之事漸釋否且構成大獄禍烈矣遷楚藩叅政以勞疾乞歸歷仕二十餘載未

嘗營家人產里居片字不至公門

閩書叅府志

陳一洙字國璜漳浦人生而穎異登萬歷進士持已當官公正廓落無所阿私所至皆有嘉績初令靈川遷計部司通儲權吳關所經營度支課務釐革為多賢聲大著擢憲副躋臬司所閱歷江右楚蜀憲度風清吏民畏懷其慷慨任事為地方計長久確有碩畫上官屢薦適為忌者所中遂掛冠歸居家孝友承歡均財諸弟尤人所難云

張廷棟字國材龍溪人郎中綽之曾孫萬歷進士授行人後先奉使諸藩贈餉無所受曾道經吳越所

縣志



知為巡鹽御史一賈人犯網其子求一言出朱提  
 為壽廷棟峻却之然心憐其父寃明日竟為白賈  
 人寃狀賈謂御史出之不知乃廷棟力也行取以  
 病劇改儀制司主事踰月而卒平生性度深純無  
 疾言遽色事母至孝有不懌必免冠跪床下母意  
 釋乃止弟廷榜字登材與兄齊名萬歷進士令太  
 平多善政有布鼓初聲鹽耳吟集

縣志

劉庭蕙字雲嵩漳浦人生五月而孤母陳氏冰操撫  
 育萬歷中成進士授新昌令邑有虎為文祭之虎  
 越境去歲旱開渠灌田民賴以濟陞廣西叅議時

沙郎不賓庭蕙以數騎入其地諭以大義皆草面  
 督學海南大得士心後以冊封事與僚佐不合解  
 組歸庭蕙至孝嘗伏闕叙母艱貞有人間哺兒以  
 乳臣母哺兒以血臣登科第母不及見臣操升斗  
 母不及養等語神廟可其奏立坊旌之著有一畝

宮存稿

府志

李棠字英菱平和人萬歷舉人授長寧令會礦使憑  
 陵立置不法者於獄旋攝興陵多奇政遷衢州判  
 擢留都治中定漂水運卒之囂清相國水利之界  
 脩社學理學田鹽法鑄錢之類脂膏不染卒祀名



宦縣志

戴仕衡字章尹長泰人遷於興化萬歷進士以新建  
 治行第一入為吏科給事中時上方以靜攝為高  
 仕衡上言元首股肱宜一體相通不當隔絕日本  
 乞封朝廷將許之仕衡復抗疏力論其不可因劾  
 尚書石星欺罔不忠及輔臣趙志臯稊稜不決繼  
 復以屯田習戰足食足兵為言凡所陳論數十事  
 悉中時弊惜朝廷不能用也竟齋志以卒府志  
 蔡杲字宏中漳浦人少有文譽與弟昇齊名昇先成  
 進士早卒杲登萬歷己丑進士授太倉知州清白

嚴介遷郎中調考功司考察稱公平擢光祿寺丞  
 光祿故清秩而杲尤自刻勵凡貲郎為屬員者非  
 公事不敢謁藻鑑明晰尤樂推引善類孳孳不怠  
 奉使冊封尋陞尚寶少卿杲豐頤脩髯神氣邁上  
 卒於京貧無以殮友人經理歸其喪縣志

陳以珪字思禹海澄人主事映之子萬歷進士授太  
 常博士明通淹博行取為同官之冠遂註禮部主  
 客郎每事有疑滯眾問陳公云何輒先謝不知然  
 後論列有饒州別駕陳奇可以忤中璫死詔獄無  
 敢視者以珪獨往治喪時論高之以疾告歸卒於



瀛西舟次

府志

王志道漳浦人萬歷進士天啓時為給事中議三案為高攀龍所駁謝病歸崇正初脩撰陳於泰疏陳時弊中官王坤力詆之吏部尚書李長庚劾坤祈立賜譴黜終不忍開內臣輕議朝政之端流禍無窮志道為副都御史劾坤尤切帝責令回奏奏上帝益怒削其籍歸

明史

顏繼祖漳州人萬歷進士歷工科給事中崇正初論工部冗員及三殿叙功之濫又極論魏黨李魯生霍維華罪狀帝皆納其言遷工部給事中再遷吏

科都給事中疏陳時事十大弊又言六部之政筦於尚書諸司之務握之正郎而侍郎及副郎主事止陪畫題政事安得不廢督撫諸臣獲罪者接踵初皆由會推然會推但六科掌篆者為主卿貳臺臣罕至且九卿臺諫止選郎傳語有唯諾無翻異何名會推帝稱善擢太常少卿以右僉都御史巡撫山東分兵阨境上河南賊不敢窺青濟劾故撫李懋芳侵軍餉二萬有奇被旨嘉獎十一年畿輔戒嚴命繼祖移駐德州時標下卒僅三千而奉本兵楊嗣昌令五旬三更調後令專防德州濟南由



此空虛繼祖屢請勅諸將劉澤清倪寵等赴援皆  
 逗遛不進明年 大清兵克濟南執德王繼祖一  
 人不能兼顧言官交章劾之繼祖咎嗣昌且曰臣  
 兵少力弱不敢分失濟之罪帝不從竟逮棄市明史  
 李瑞和字寶弓漳浦人崇正進士淹博豪邁不脩邊  
 幅為治蕩滌煩苛簡易近民初任松江司理時知  
 府方岳貢政尚嚴肅瑞和濟之以寬訟獄多所平  
 反然才識明敏人亦莫能眩也松人塑像生祀之  
見松江府志名宦傳尋拜監察御史巡視中城奉讞陳新甲  
 獄稱旨視鹺兩浙革除夙弊丁外艱歸家居四十

四載竟不出每歲歉輒平糶濟荒且周其貧乏浦

人德之著有牆東集學夫詩黃道周為之序縣志

楊履園字萊民漳浦人廉使聯芳季子世為明勳裔

生而倜儻丙戌後隱居不就試談明季事每怏怏

詩歌尤悲傷憤懣嘗作書與門客宋琳談及興復

琳持其書首於官官索之履園慷慨就鞫當事持

其手書責之曰年少酗酒妄談不法耶履園答曰

某故侯孫子食舊德久矣未免有情實不醉得死

所幸耳當事怒置之死時年二十四履園有夙慧

讀書日萬言為文奇警類長吉府志



陳國腆字非石海澄人崇正進士未殿試歸隱漳上  
 蒼園足跡不踐城闔戊子歲荒傾家施賑時大吏  
 以地方人材舉屢以疾辭氣節峻厲服御多用古  
 著有易啓微及史宗府志

國朝

康元侯字錫功龍溪人弱冠補諸生順治九年春海  
 賊自廣至掠沿海入許江元侯督里人列舟以戰  
 殊死鬪賊垂却而他舟動賊遽登樓從元侯後刺  
 其背遂歿族叔維宗及里中同死者十餘人

陳天達字可行漳浦人康熙進士少孤寡甚授徒自

給為弟妹婚嫁登第時年五十九矣兄弟猶同居  
 合爨甲寅之變携家入山與其子講明經義偽寇  
 脅之仕不應幾得禍會有為之解者乃免丁巳恢  
 復總督姚啓聖同年友也將特疏於

朝天達以老病固辭乃日與親友子弟課文講學  
 年九十二猶手不釋卷與人推誠相與一無所飾  
 但非禮不可犯耳親知貴顯不輕問遺非公事未  
 嘗一至郡縣卒祀鄉賢

張雄字受夫南靖人康熙進士多材畧三藩之亂至  
 戊午海寇復作總督姚啓聖屯兵漳州聞雄名疏



請留軍前贊畫以海澄初陷敵勢方張先議撫冒  
 險渡海諭以順逆存亡將卒聞之皆願因雄歸誠  
 所招降甚多自是每戰輒捷既平叙功加正一品  
 入為工部都水司主事陞刑部郎中剔去常規斷  
 獄多所平反以父老歸養居鄉建議從田問賦草  
 現當散班及歸宗合戶等事更脩明倫堂置義塚  
 年八十五卒

府志

謝亦驥字玉路龍溪人弱冠補諸生試輒冠其曹然  
 屢躓場屋時為詩歌古文以自樂康熙乙卯以歲  
 薦試京闈為韓葵所取士年已五十矣閱十餘年

補丹陽尹丹陽繁衝民力凋瘵亦驥寬征入省後  
 役踰年民為之歌咏尋以老病乞休既歸居東郭  
 倉園中與李基益為文字友逍遙山水間作數林  
 歌時多傳之卒年八十八著有浩園詩丹陽集

府志

藍鼎元字玉霖漳浦拔貢生南澳總兵廷珍之從弟  
 也長身美鬚髯善談論康熙辛丑廷珍總兵征臺  
 灣命叅戎務指揮並中機宜羽檄交馳倚馬立辦  
 決勝擒賊多出其計廷珍視為左右手晚以軍功  
 得官著平臺記畧東征記薦入都上奏畧五千言  
 稱 旨授普寧令所至多善政雍正間擢廣州知



府卒

臺灣縣志

魏元琦字浩軒龍溪人康熙己卯舉人知宜興邑糧  
十餘萬吏多中飽允糧吏賠贖不支元琦立官收  
官允法宿弊頓清漕政推江左第一庚子分校秋  
闈所取如陳其凝程盛脩皆一時名士歸囊不名  
一錢食貧以終

縣志

莊亨陽字復齋南靖人少受業於李文貞光地之門  
康熙戊戌成進士授濰縣令母就養卒於塗歸而  
廬墓三年自是不忍離其父隱居教授乾隆初以  
薦授國子助教時鄂西林陳海寧兩相國相器重

欲一見之亨陽終不往西林曰吾非公事不出城

莊君以老儒生視我不妨顧我矣亨陽始入見志  
相得自是亦不再往旋由郎署授德安同知踰月  
升徐州守徐仍歲水災亨陽相川澤諮耆民具方  
畧請廣開上游水以洩異漲且告石林可危未及  
措而石林決沛縣城將潰亨陽疾往率眾堵築七  
晝夜城完在徐三年兩遇大荒勤賑事日不暇給  
擢淮徐道淮海承屢稔凋敝不異於徐每對饑羸  
遺民中心愧畏夢寐中時標辟呼嗟州有鹽河葦  
水通商運故障塞海口雖異漲非編告大府不敢



開亨陽陳於制府已定議遇水漲命吏先開洩而後報開民免沉溺視灾核賑以勞卒於官平生學行為賢士大夫所重居憂時泰安趙相國國麟撫閩請主鼇峯書院亨陽以持父喪辭其家居來學者以百計乾隆九年京察欽命大臣各舉一人自代內閣學士李清植舉亨陽公論大服所著有

秋水堂集河防算法書

方望溪集

延平府

宋

蔡元方將樂人登熙寧進士初主鄱陽簿歷知懷安

博羅南豐縣以年勞改奉議郎元方為人果毅明

達遇事立斷初懷安代有日會更役法乃親按一

日而畢吏不得為奸既去旁邑吏以舞籍得罪陷

重辟無一免者吏始德元方在南豐時歲大饑設

法賑之民賴全活為政彊敏凡與民約輒不敢犯

然簡節疎日使民易避其破奸剔蠹必去其本故

所至皆有風績時稱良吏

閩書

魏任字亨之南平人唐太常少卿滋七世孫登元豐

進士初尉海鹽縣獲賊尋資授虔州節度推官太

守方以嚴明自任郡卒有忤其意者將寘極典任



力爭之後讞於朝卒從任議徙蘄州防禦推官承檄攝羅田尹縣適草創經營有方民不知擾以薦改宣德郎知石城豪橫斂手盜賊屏跡或雨暘不節祈禱隨應轉奉議郎兵馬都監賜緋閩書

李信甫諱友諒以字行後改字誠父侗次子同兄友直登紹興進士初任建安縣主簿後仕至監察御史以特立不容於朝出知衢州縣志

黃伯固字德常將樂人龐博而堅凝鈎經索史嚴義利重然諾紹熙中薦授建昌尉癸丑特奏名進士嘉定乙巳以奉議郎知上高縣精明剖決抑強扶

弱奸豪屏迹財賦虧陷為之稽考版籍搜剔無遺公帑充足去日有餘錕悉貯縣庫累官西川安撫制置使陞兵部侍郎清譽聞於中外卒賜祭墓贈少師謚忠簡祀鄉賢閩書

吳一鳴字伯大南平人紹定進士為益陽縣尉帥李華聞其賢置之幕下政事一委之復薦於朝累調德化令時康維新帥漕或謂之日例三司歲得舉其屬一人公何獨不薦新日留以待賢或日賢者為誰日吳一鳴也卒薦之得調長樂始至見倉庫蕭然詢知其縣多上官寄莊苗糧官不敢督責故



耳因嘆曰官自我得之自我失之何憾時叅知政  
事陳偉在朝鳴撻其幹督糧甚急幹以告偉偉曰  
令爲誰曰南平吳一鳴也偉曰南劍亦有此人耶  
由是諸勢家聞之悉爲輸納乃廣學舍脩官廨邑  
人作歌頌之邑有盧尚書者被劫得賊所遺刀一  
鳴悉名縣之鐵工出示之一工曰此某所作也命  
諸工還獨留詢之所爲作者乃泉州巨賈之徒也  
一鳴以計獲之一訊而伏後爲仇家所誣去任邑  
人號哭於道執政知其非罪復調臨安府僉判時  
樞密鄭清董脩大內疾作稔一鳴之賢遂委代之

官終浙東帥司機宜

閩書叅  
府志

馮夢得字初心將樂人篤志嗜學博洽經史登嘉禧  
進士歷給事中累官禮部尚書居官不私薦拔嘗  
奏立龜山書院請賜田養士復其後立祀時謂扶  
植道南脉夢得之力居多府志

蕭來鳳字舜儀號賓竹將樂人徐卽登督學入閩講  
學詢要領悟者絕少來鳳獨以知止脩身卽可卽  
登日吾師李見羅闡明絕學汝得當往事焉羅與  
語多所契合退謂人曰將樂有舜儀身體力行卽  
是龜山不死問答具載來益堂止脩集由貢訓海



陽諭饒平署海饒揭三邑篆宦囊如洗正從祀鑄  
 祭器請罷月餽公宴推解以濟貧士遠來問道者  
 凡十一邑學者稱為賓竹先生來鳳力學甘貧食  
 不梁肉衣不絮帛好着方冠為上下八臬著名三  
 綱五常巾道路轉折如明堂矩步目不邪色耳不  
 淫聲終身以倡明道學為已任著有演宗問答雅  
 歌集年老致仕卒於家

府志

明

鄧文鏗字德聲永安人洪武進士任茂名縣以最入  
 為刑部主事累陞僉都御史風裁獨特時貴戚有

冒禁鬻私茶者事關邊計文鏗劾之其人卒寘於

法文鏗亦出知武昌府改知德安轉苑馬寺卿

縣志

鄭克敬將樂人洪武中賜名公正因字克敬由薦辟

任延平訓導陞監察御史正色立朝以廉介見知

嘗賜宴不食大官以聞上詰其故對曰今日臣父

忌不忍食肉上曰尊者賜少者不敢辭况君命乎

對曰臣聞有父子而後有君臣上悅賜鈔五錠

閩書

吳復字克初將樂人永樂進士授湖廣道監察御史

居官清慎忠直知無不言為國薦賢除奸得風憲

體文皇每日為圓眼御史歷官廣西副使

縣志



吳勝字志剛將樂人宣德中由選貢知平原縣蝗災  
教民小子撲收之多者受上賞悉出俸錢歲饑設  
法賑濟活民邑災步禱立熄政專愛養不附權勢  
以供億忤掾左遷廣西慶遠衛經歷卒於官府志

陳直字思誠將樂人由太學生拜饒州通判陞揚州  
府政尚平恕不事鞭楚於貧民尤加存恤歲旱跣  
足自罪以禱雨雨應隨注時稱有古循吏風性恬  
淡寡欲居官常種蔬以自給云府志

張彥祥順昌人正統十三年為賊所擊賊知其勇脅  
使助已不從賊殺之臨死罵不絕口鄉人稱烈府志

劉汝懋字文郁沙縣人膂力精銳正統戊辰鄧寇攻

破縣城汝懋據巷戰運槩如飛當鋒立斃追至翔

鳳橋格殺數人槩柄中折無後應者力疲坐石上

賊環視不敢近但曰汝至此不能生矣肯從我當

尊汝為主汝懋罵不絕賊以鎗刺之中腸而死府志

傅福保順昌人正統十三年賊掠其村落偕員保二

人覘賊俱被獲賊欲脅其從不聽令剔其肉罵不

顧以火炙之尤罵不絕口而死縣志

楊丹珉字德玉尤溪人知永新縣興學校賑窮乏抑

強暴民皆悅服邑有舖長謀利殺人誣住舖者甚



衆丹珉訊得其實出屍田禾中殺人者抵罪被誣者獲免歲旱禱雨輒應蝗起不入其境後移溧水終泰州同知俱有治蹟縣志

陳仁政字用德沙縣人權十二世孫天順間由太學生授河南布政司都事時黃河爲患民不聊生仁政自携飲食督築堰禦之民免墊溺舊有冤獄不能決仁政乞臺檄覆訊之竟白其冤爲人樸直樂恬退進表赴闕懇歸許之陞一級致仕府志

田濡字伯潤大田人正德間授處州衛經歷衛僻武職素倨濡剛毅持重反見嚴禮軍吏方櫟與其鄰

曲訟十載不決濡下車平之指揮某娶孀婦盧氏

既死盧依前夫子復餽金求優給濡却之曰盧既失

節夫死輒歸乃爲是請法可撓乎時駕南巡逆彬

檄諸衛以遼金二書進衛無以應擬醵金饋使者

濡厲聲曰忤使者意棄吾官矣奚科歛貧民爲未

幾遭繼母喪徒步歸血流至脛廬墓哀瘠而卒府志

蔡夢暘字伯春尤溪人文盛孫沉靜嚴格溫厚近人

以庚子舉人爲英山教諭歷雷州督捕判官兼理

糧務雷州盜賊株害最繁暘雪幽釋滯亦克用勸

每察民之不能輸供者輒捐俸充納窮民感惠致



仕家居蕭然環堵耄猶讀書勤訓子孫屏跡公廷  
年七十七卒

府志

吳必學字以思南平人嘉靖舉人知亳州減徭役建  
學宮未幾丁內艱服闋補海州時倭寇猖獗築城  
捍禦民賴以安改象州設法靖獠賊歲屢禱竭力  
賑貸遷九江同知復補臨江所至清介有聲

府志

游綸字邦濟南平人嘉靖乙丑以貢謁銓時子居敬  
已官御史綸義不干請授睢寧縣尹爲政務安養  
休息爲民蠹者亟除之攘蝗災濬河道民得粒食  
憫邑疲瘵請減協濟邳州夫糧千餘石睢民至今

德之致政歸家居簡出非飲射不履公庭純實簡  
樸鄉人皆信慕之時居敬已歷侍郎每遺書勉之  
曰盡心職業卽爲忠孝其耿介之守教誨之類如

此

府志

游於北南平人由恩選令雩都有巨奸殺人匿尸會  
問屢更莫決於北廉得其狀獲尸橋下奸驚服當  
道旌其能再令醴陵奉例量丈一清夙弊民便之

府志

林若桂字斯芳南平人授溧陽訓導轉遂昌教諭興  
文課士多所造就陞宜山令邊徼物產蕭條民獠



刑苑紀元 卷四十一  
雜居難以法治若桂正已操持因俗撫諭凡舊例  
因循者悉振作之歲旱集誠禱雨歲饑捐俸濟民  
生員徐一槐等屈於冤為辨白之會巨寇藍龍虎  
等為亂計勦元惡地方以寧入覲後復任卒於途  
宜山人哀思之

縣志

田一儁字德萬隆慶戊辰會試第一選庶吉士雅以  
大節自砥旋授編脩奉使淮藩不受餽遺充經筵  
起居官脩累朝實錄進脩撰侍讀管制誥萬歷丁  
丑大學士張居正奪情輒假旨杖諫者箝制天下  
同館趙用賢吳中竹與焉一儁亟與趙志臯抗疏

論救時王錫爵掌院事戒以姑過張所諷勸之於  
是偕臯儁詣張所首為杖者解張默不應則奮氣  
昌言責以綱常之義語甚峻直張憤慙無地欲引  
佩刀自裁一儁等拂衣出張欲圖報之會一儁與  
錫爵先期告歸得免後張敗起故官同脩會典擢  
祭酒飭規條絕貴近關說有一生持刺求進一儁  
名試抑奪之生驚甚寓言譏訕一儁疏於朝斥為  
編氓諸士始逡巡閑軌尋擢禮部右侍郎兼侍讀

學士

閩書叅  
縣志

林以文字雅博南平人司訓瑞金署瑞金石城信豐



三縣爲政清慎有太學生以家事構訟以文下車  
投函千緡却之明長平其訟生獻數百金爲壽再  
却之邑欠積穀額餉十有六七以文臨去捐俸代  
補士民德之歸田策杖郊野撫訓族弟子鄱陽閔  
趾固以文受知士來令南平登堂而拜且遺金帛  
辭曰汝筮仕猶故態耳安辨此邑令每重其品下  
車輒屏騶造訪之

府志

嚴九岳字海日永安人萬歷進士任梧州推官每多  
平反歷署府縣除草弊陋五載考績陞戶部主事  
轉郎中督通州餉往運官糧多苦淹滯至產破人

亡九岳則納不停晷糧戶始有生理時邊軍交訖  
奉運內帑數萬餉遼陽遲者罰無赦九岳晝夜兼  
程以赴有脚運羨餘千計悉獻經畧以賞士及告  
歸課績陞岳州知府病劇未任卒

府志

國朝

黃中正永安庠生順治丁亥城陷義不受辱取繩分  
給闔門令自盡長男良詔年十七婦李氏十八女  
如妹十五幼男良諭甫五歲俱共梁縊死惟良諭  
爲賊救甦同時諸生李秉鐸以罵賊自經林馥以  
守城被殺皆一時死事之傑

府志



黃麟瑞字輯侯號趾遊沙縣人幼倜儻不羈嘗負笈  
 求學榕城意不在語言文字言笑不苟步趨中度  
 毅然以道學自任有友陳某被盜以命誣麟瑞義  
 形於色率庠士雪其誣又為亂兵所掠不憚艱險  
 鬻產以出之筮仕古田連江兩學博擢桐梓令桐  
 梓古夜郎地也值雲屯之際建學脩城招流民清  
 丈量會有征勦遷移諸大役為民請命詳減驛夫  
 三載報最列薦卒於官

縣志

福建續志卷四十七終



